

1 Koridi

Koridi Mwaalyaraavina Poli Pikarya Aaya Mudi'nanya' Yidavakesi.

1 ¹Nya'mweihi, Koridi mwaalyaihi,
Polinyi paaziya' yihyasiwaabe. Gotiyai simunya sara yawirakevi
Kiraazitiyai Jizaazai nyidaasadeinyi apozeliyaiinyi yima'nya'neinyi
nyijivwaramaaraakeinyi. Nabaai Sozithenizai neya'mwei nimiji
mwaalikelyi. ²Gotiyare kusilaanyaviyaihi Koridi mwaalyaihirina
yihithawasivanaabihe. Kiraazitiyai Jizaazari sarimire girikita'nanya
duimwagasi'nikeihiri Gotiyai yihizivwaramaaraake'na Gotiyareihii yuna
tewaanyaihi yima'nesaihilyi. Nabaai anga yuyabanya yuyara nemire
Naangei Jizaazai Kiraazitiyarine yayavi yilaaya widadivisara Gotiyare
tewaanyara yima'nesare. Yi sahwai kuminyi Naangei yaka neminyi
Naangelyi. ³Nemire Nenimaangei Gotiyalyi Naanga Jizaazai Kiraazitiyai
kwalyi tewaanya yange'na yihigaimwagika! Kirimire kwaamu'nanyabwi
yihwarana!

Poli Gotiyari "Su! Su!" widake'nesi.

⁴Kiraazitiyai Jizaazari wilamwaaishasa'na Gotiyai gamire tewaanya
yangebwi sihumale yihizaavakelyi. Sarevi yuyagaa' sariminyina Gotiyari
"Su! Su!" widadinyainyi. ⁵Sare' dare'nanyi. Kiraazitiyari wilamwaailesavi
Gotiyai sariminyine yuya yunebanna yihyakelyi. Yi yuya yagaala
wijiwaakya saji yuya kunya yawita saji kininnakeihilyi. ⁶Kiraazitiyarina
yihizalikurakobaaibi' sarimire simunyavi mena diraginya yihwarake'na
sahini kininnakeihilyi. ⁷Sarevidaa'nyi nemire Naangei Jizaazai
Kiraazitiyai ku'maayabanna yima'naabathe' sarimi yemwaaishasagaa'
Kurya Tewaanyare sihumale aane piri' kiri' yihigainadeihi mi'. ⁸Nemire
Naangei Jizaazai Kiraazitiyai sariminyi diraginya yivaimwanga

yihyathelyi. Sara kuna kihyoji aayagaa'nanyi. Yi sagaa' Yirika Naangegaa' sahwai walaabathehaa' Gotiyai yihyvaimwade'na sarimi kayaa'na yiwetawakya maayaihiri Gotiyai yihizidavadei mi'. ⁹Sare' dare'nanyi. Gotiyai gamire Gawaalivaangei Jizaazai Kiraazitiyai nemire Naangelyi yihye'mwannamwaalya'neihiri jaka yihizivwaramaarakelyi. Yi sahwai sara dake' "Sara yideinyi," yi sara neyivanikelyi. Nebulya'nanyalyi. Sare'na diraginna yihivaimwannikeihi, yi, yiwetawakya maayaihi dimwaalyideihilyi.

Kiraazitiyare kusilaanyaviyara jaapainesa'nesi.

¹⁰Nya'mweihi, nemire Naangei Jizaazai Kiraazitiyare diraginya' nyijaavake'na diraginna dara yihithima! Sarimi yuyaihi yagaala avaainanyanna nayaa dizila! Sarimi kuna jaapainadivi' yagaala ge ge madibinera! Simunya avaainanyaburiji yawibwarya'ne avaainanyaburiji je'mwannamwaalyila! ¹¹Nya'mweihi sara yihithiwe' darevinyi. Kilowiyavirera sariminyina dara nyidiwa'daa' "Sahwaraavi mayagaalya kuna warika." ¹²Nyidiwa'daata yuyangina divanige. Sarimijiya gazarazara ge gengi dara divaniga!. Pwara dina "Yi, nimi Polimireinyira." Nabaai pwara dina "Yi, nimi Aapolizareinyira." Nabaai pwara dina "Yi, nimi Pitareinyira." Nabaai pwara dina "Yi, nimi Kiraazitiyareinyira." ¹³Kiri' nimi yihithima! Kiraazitiyari japalaannei daaka! Sarevi be'na jaapainiwaa! Polinyi sariminyineba yisaviri maratamarimwesainyi daa! Polinyine yayavi bavitaazyabwi maaresavi daaka! ¹⁴Sariminyawi nimi Kirizipaazalyi Gaayaazalyi yune saraarina bavitaaziya' ye. Yi a'mwe pwara aawa. Daza'na Gotiyari "Su! Su! Sare' tewaanna ye," widivanige. ¹⁵Sarevi yi aane pwai kwai yagaala yiniga wi'na dara nadathika! "Polimine yayavi bavitaaziya' nyake'na sahwareinyi." Sara maji ya'ne'na yilaaya yivanige. ¹⁶O, navika nyiwaka! Nabaai Sitepaanazare angeviya pwaraaviji bavitaaziya' yeinyi. Yena ayahi pwariji kwaraariji bavitaaziya' yeinyi dingaka? Sa' nimi myawiriwa. ¹⁷Sare' darevinyi. Nimi a'mweraavi bavitaaziya' ya'neinyi Kiraazitiyai nyimaryasaabakeinyi mi'. Aawa. Gamire yagaala tewaanya wijiwaakya'neinyi nyimaryasaabakeinyi. Yagaala sa' widadinyavina a'mwe simunnakera Kwaaka davakiyangina dadivitabaai' nimi sara majiwana. "Kiraazitiyai yisavi balake' saba sana yaasiwaka nyima'nadika!" dena a'mweraavire yawisabwi sara madiwineinyi.

**Kiraazitiyai Gotiyare diraginaangei simunyavi
yune aaya kaavilyarinesi.**

¹⁸Sare' darevidaa'nyinyi. Piri' daresi. A'mwe pwara, Dikevinera kayaaka yinikevi tusavi wivanigasara Kiraazitiyai yita yovihirarannikevi balakevine yagaalya'na dara yawi'divisare "Yagaala sa' simumaayasi."

Piri' daresi. Nemi a'mweina, Gotiyai neminyi nevadaahasamaa'manikeina dara yawi'daanyaine “Yagaala sa' Gotiyare diraginaange' neyibwaridaakuvanikesi.” 19 Sare' darevidaa'nyinyi. Gotiyare bukuyavi sinnawi Gotiyai jaake' dara dini'

“Simunnakeraavire simunyabwi kayaaka yigalideinyi.

Simunya yawi'nikeraavire sidusabwi yaasiwa'nanya yibwaridaakudeinyi.”

20 Sarevi dahaasara simunnakeraavina gatha'darevaka! Bukuyangi pada'galayawirangadivita sidu'nakeraavina gatha'darevaka! A'mwe dathahaasara gavamarasi'nyiyagaala didivisaraavina gatha'darevaka! A'mwe Kwaaka davakiyaraavire simunya' Gotiyai simumaaya' wakake' midaaka! 21 Sare' darevidaa'nyinyi. Gotiyai simunya nebulya' kininnakei dara yawi'na “A'mwe Kwaakevakiyara yune simunya kunyabwina niminyi myawiramaari yipinere.” Sara yawi'na yakevi, Gotiyari dara wivu'nakesi. Nimirera nimore yagaalya' wijiwaakipi'devi pwara Kiraazitiyari limwabi'deraavi padaihasamaarideinyi. Kwaakevakiyara wijiwaakya dazavina kwaasi dara yawi'maniga' “Yagaala sa' simumaayasi.” 22 Juyara yijiwaainya atika maru'nasangi yidaangadivi' yawi'divisare “Sahini tinna wanganawaaji yagaalya' limwagaraadera.” Girikiyara simunya' bi'divi' “Sarimire yagaalyavi aaya kaavilya' nemire simunyavi yawiramarawaaji 'Nebulya' dingaka? Nebulya' midingaka?' yihithaadera.” 23 Nabaai sare kiriwaari nemi saina Kiraazitiyari yita yovihirarannikevi maratamarimwesarine yagaalya' wijiwakadaanyaine. Piri' daresi. Yagaala daza' Juyara kayaasimunya wima'naderera. Nabaai piri' daresi. Ajimya yuyangiyara yawi'divisare “Simumaayasira.”

24 Kiri' a'mwe pwara Gotiyai jaka jivwaramaa'nikera sahwaru Juyaraji Girikiyaraji saraavine Kiraazitiyai sai Gotiyare diraginaangei yaka Gotiyare simunyavi aaya kaavilyalyi. 25 Sare' dare'nanyi. Yagaala daza' “Simumaayasireva,” Gotiyare yagaala sa' simunya naange' kininnakesi. Yi a'mweraavire simunya savi wawilavikesi. Nabaai “Waryaanyasireva,” Gotiyare yagaala sa' diraginya naange' kininnakesi. Yi a'mweraavire diraginyavi wawilavikesi.

26 Sare' aaya kaavila daresi. Nya'mweihi, Gotiyai jaka yihizivwaramaakegaa' sarimire mwaalyabwine'na ayina jawiranganyila! Sarimijiya a'mweraavire kilaakejikiya simunyabwi kininnakera a'mwe kwalaalyara mwaalesara daaka! A'mwe naangera diraginnakera sarimijiya sara a'mwe kwalaalyara daaka! Yaya munyaba yinikera sarimijiya sara kwalaalyara daaka! 27 Aawa. “Simunnakeraavina makinyaburi bwalawiekirakima!” daka Gotiyai a'mwe Kwaaka davakiyara sariminyina “Simumaayarera,” dadivisaihiri yihithahilakakelyi. Nabaai “Diraginyaraavina makinyaburi bwalawiekirakima!” daka Gotiyai a'mwe Kwaaka davakiyara

sariminyina “Waryaanyare,” dadivisaihiri yihithahilakakelyi. ²⁸“A'mwe naangeraavi kuneraavi wimwaaihima!” daka Gotiyai a'mwe Kwaakevakiyara sariminyina “Yaya kwaakebanyara yaasiwakere,” yi “A'mwe angwangwere,” yi “Kunerera,” dadivisaihiri yihithahilakakelyi. ²⁹Sarevidaa'nyi Gotiyaryaba a'mwe kilaa'naka yuyarajiya aane pwai kwai gaminne yaya' munyabanna mamakilyi yannelyira gamire simunya piburina, gamire diraginya kiburina. ³⁰Kiraazitiyai Jizaazari wilamwaaihya'neiheri Gotiyai yihimwaaihakelyi. Gotiyari neminyine'na Kiraazitiyai Gotiyare simunyavi aaya kaavilyai yima'nakelyi. Yi sahvari neminyina Gotiyai dadelyi “Yida'maraangeihi nimireihilyi.” Yi sahvari nemi a'mwe tewaanyaina Gotiyareina yima'nya'neinaavi nemwaaihakelyi. Yi sahvari nemire kayaa'nanyangina ayahi nemubamaarakelyi. ³¹Sarevidaa'nyi “Sara yaana!” daanneinaavina Gotiyare bukuya' dara dinikabaaibisasi.

A'mwe gaminne yaya' munyaba makidei

Naangerina gaverina nayaa sara makilana!

2 ¹Nabaai, nya'mweihi, nimi kwainyi sinnawi sariminyawinna wawegaa' Gotiyarine jalikurakya' yihiziwaakadi yagaala simunya yawiririkisaji mamakabyeinyi. Sarimi “‘Ai, a'mwe sai simunyavi neminyi newavila'delyi,' nadipidika!” dena sara mihiziwaakyeinyi. ²Sare' aaya kaavila daresi. Sariminyawinna mwiyyagaa' nimi mena dara yawibwarayawiramarake, “Sahwaraayaba Jizaazai Kiraazitiyarina simunya' yune sahwarine'na nayaa yawirideinyi. Yi yita yovihirannikevi mararamarimwesarina nayaa yawirideinyi. Simunya aane piri' kiri' yawirideinyi mi'.” ³Yi nimi sinnawi sariminyaba yihye'mwannamwaalegaa' nimi sainyi waryaanyainyi. Nimi “Gotiyare wawinya naange' nayaa yiwineinyi dingaka?” dadi wawinya sa'na lika naanga yadi bi'bita yadi yihiziwaakeinyi. ⁴Nabaai yagaalya' yihithadinyasi nimire yihiziwaakadinyasi yi dazawaai a'mwe simunya yawi'nikeraavire yagaalyaburi mihiziwaakye. Nimire simunya savi sarimire sabwi marima'nya ya'nevi mihiziwaakye. Aawa. Kurya Tewaanyai gannya diraginyavi yihibwaridaakwakesi. ⁵Kiraazitiyari limwagya'neiherina waryaanyaibisainyi mwaale. Yi nimi “A'mweraavire simunya saburi sarimi nebulya'na limwagata nyipidika! Aawa. Yune Gotiyare diraginyavina limwabika!” dena sara yihyeinyi.

Gotiyare Kuryai simunya nejaavanike'nesi.

⁶Sara yihithiwe kiri' a'mweraavi Gotiyare sabwi diraginya mena yivaimwannikeraavi nemi simunya yawi'nike' wijiwakadaanyaine. Sare kiri' sa' a'mwe dahaasiyaraavire simunya yawita' mi'. Nabaai dahaasara maremwaaidivita sahwaraavire simunya yawita' mi'. Dahaasara yiwiya'nere. ⁷Aawa. Nemi Gotiyare simunya' wijiwakadaanyasi.

Yagaala daza' Gotiyai lika yulyaryaakesi. Daza' nebulya' yoimavajalikurakyavinanyasi. Gotiyai Kwaakeva' mwakyaakegaal' yi sahwai simunya daza' mena dahilakakelyi. Nemi byaanna diraginyavi nawi'nyavi mwaalya'ne'na sara dahilakina yakelyi. ⁸A'mwe dahaasaraavi maremwaidivita sarajiya aane pwai kwai simunya savi aaya kaavila dazavi yawiramaa'nikei mi'. Sare' diwevi aaya kaavilya' daresi. Simunya sa' yawi'nikara mwaabizi kwaji yi sahwara Naangei Sigunyaviyai byaanna diraginya' kininnakeri yita yovihirarannikevi mamararamarimwi kipidika! ⁹Aawa. Sahwara savina myawiryesa yeta dazanna Gotiyare bukuyavi sanna dara dinikabaaibisasi.

Piningi tinnyai mwananyaja
 Nabaai kadiki' mu'nyaja
 A'mweraavi simunyangi mima'nyaja
 Gaminyina tewaanya wivu'naderaavine
 Nabaai sahwaraavi wigaimwagya'neraavine
 Gotiyai mena yovirawakakengi.

¹⁰Sare' aaya kaavilya' daresi. Yi gamire Kuryari nevu'nadeinaavina Gotiyai lika yulyaryaake neyibwaridaakwakengi. Sare' aaya kaavilya' daresi. Kurya Tewaanyai kaavila yuya sangi wijalangesakadelyi. Yi Gotiyare sabwi neminyi lika mena yulya'de sangiji Gotiyare simunyawai wijalangesakiwaidaawadelyira. ¹¹Sare' darevinyi. A'mwe pware simunyaburi be a'mwei yawirangadelaka! Aawa. A'mwe dazare gannya kuryaina, sai gaminyi kusawi wilamwaaide sarei yawirangadelyi. Sabaai' Gotiyare simunyabwi yawirangadei a'mwe pwai mi'. Aawa. Gotiyare gannya Kuryaina gave sahwaina yawirangadelyi. ¹²Yi nemi Kwaaka davakiya simunya mamaaryo. Aawa. Gotiyaryawidaa'nya simunya Kuryari maarolyira. Yi Gotiyai neminyina "Sahwaraavina yange'na wijaave yuya gaimwanga sanna yawirangabika!" daka kaneya' Kurya sahwari maarolyira. ¹³Yi gaimwanga dazangi nemi yagaalya' widadaanyi. A'mweraavire simunyabwine yagaalya neyiwiryadivisangi widadaanya mi'. Aawa. Kuryare simunyabwine yagaalya neyiwiryadengi widadaanyangira. Kurya Tewaanyai yagaalya nejaavadeji Kuryare nebulyanna wijiwakadaanyaine. ¹⁴A'mwe kwai, Kurya Tewaanyai maayai Gotiyare Kuryare yagaalya maa'dei mi'. Sare' aaya kaavilya' daresi. Sai dara yawi'delyi "Daza'na yagaala simumaayasira." Yune Gotiyare Kuryai negaimwada nayaa yawibwarama'daanya'na dazai Kurya Tewaanyai maayai dazavire aaya kaavilya' myawiranganyi yannelyi. Myawiranganyi yanne'na "Simumaayasira," sara yawi'dei. ¹⁵Kiri', piri' daresi. A'mwei Kurya Tewaanyai kininnakei sai yuyangi nayaa yawibwarangadelyi. Piri' daresi. A'mwe aane pwai kwai Kurya Tewaanyai kininnakerina yiniga wi'na yawibwarangadei mi'. ¹⁶Sare' darevidaa'nyinyi. Dara dinikabaaibiki

“Naangere simunya' aaihwai yawirangadelaka!
Yiniga wi'na yawiryannei aaihwalaka!”

Nabaai sare kirivi nemi Kiraazitiyare simunya' kininnakeine.

Kiraazitiyare kusilaanyaviyara Koridi mwaalyara jaapainesaraavinesi.

3 ¹Nya'mweihi, nabaai nimi a'mwe Kurya Tewaanyai kininnakeraavi widadinyabaaibi' mihizi yiwineinyi. Aawa. Simunya sinnawinya' kininnakera kilaakejikiya yawisa maremwaalikeraavi widadinyabaaibi' yihithiweinyi. Kiraazitiyari wilamwaihata bwaranyarabisaihiri yihithiweinyi. ²Nya'ne aamunya yihizaaveinyi. Wapaaya diraginya mihizaayeinyi. Sare' darevidaa'nyinyi. Dazagaa' wapaaya diraginya tika pi'maanganya ye'. Yune sare'na mi'. Aawa. Dahaa' kigaasi sarimi kuna mi yipineihilyi. ³Sare' darevidaa'nyinyi. Kilaakejikiya yawisajiyaihi kuna mwaaiha'. Darevinyi. Sarimijiya pwai gya'mwerina tiganaarya sabulyi yi nabaai maimaangebulyi sasare sabwi kuna yihwari'. Sareyaba kilaakejikiya yawisajiyaihi midaaka! A'mweraavireburina kaanya yamaryadivisaihi midaaka! ⁴Yihithiwe sare' aaya kaavilya' daresi. Yi sarimijiya pwai dara dina “Nimi Polimireinyi.” Yi pwai dina “Nimi Aapolizareinyi.” Sana sana yivaniga'. Yi sasare dazaburi sarimi Kwaaka davakiyaihi kuna damwaihava!

⁵Sarevidaa'nyi Aapolizai sai bewalaka! Polinyi sainyi bewainyaka! Naarimi sainaai yuna widaayadasainaalyi. Naangei naariminyi wawinya' sari piri'na pwainyi piri'na nehizaavakabaaibi' widaayadasainaai sara kyagoi naarimire yagolyavi sarimi Kiraazitiyari limwagaresaihilyi. ⁶Nimi tika wapaayavire wia burideinyi. Aapolizai wia sangi aalya' wijaavakelyi. Sare kirivi Gotiyaina yadaasi ariwinya bilyadengi. ⁷Sarevi a'mwei tika wapaayavire wia buridei sai maalikelyi. Nabaai a'mwei aalya wijaavadei sai kwalyi maalikelyi. Naangeraai mi'. Aawa. Sai yadaasi ariwinya bilyadei Gotiyai sai gave sahwainanyai naangelyira. ⁸Yi a'mwei wia buridelyi yi a'mwei aalya wijaavadelyi saraai kirimire wawinyavina yune avaainanyaraalyi. Saraaridaa'nyi pwai tivikita piri'na pwai piri'na saraare wawinya yadisawaarina maarikaderaalyi. ⁹Sare' aaya kaavilya' daresi. Naarimi sainaai Gotiyare avaiwawinyainaalyi. Sarimi Gotiyare wawinyaihilyi. Sahwai sariminyi yivanikelyi.

Nabaai Gotiyare anga mannikaihilyi. Sahwai sariminyi yihimadithaakwadelyi. ¹⁰Gotiyai niminyina yanga gaimwangebwi nyijaavakevina anga majavine maremwaaide sidu'nakei yadevaabi' nimi tivi'na likileinyi. Sara likilevi a'ba a'mwe pwara ye'mwannayilamadivisare. Sarevi nabaai sahwaraavi gazaizai mala nayaa yiwannada nayaa ye'mwannayilamadana! Yagaala nawi'nya wijiwaakana! ¹¹Sare' aaya kaavilya' daresi. Angeviya likilya nebulya'nanyai mena wari'. Sai Jizaazai Kiraazitiyalyi. Nabaai likilya pini a'mwe aane pwai kwai yiniga wi'na

likilannei mi! ¹²Yi nabaai a'mwe pwai likilya dazari “Ange' munyawu yilamadima!” daza golijayi madathei dingaka? Silivaayaji madathei dingaka? Sila nawi'nya mubya naanga yadivisaji madathei dingaka? Nabaai yisaji madathei dingaka? Yannyaji dingaka? Kwavisaji dingaka? Kaabinnyaji dingaka? ¹³Yi a'mwera sara mabiza' divi gazarezare wawinya' ku'maayaba yima'naabathesi. Sare' aaya kaavilya' daresi. Kotiya ya'negaa' yirikeri' yijiwaainadesi. Yi dikevi wijalangesakade'nanyi. Dika daza' yawiranganya'ne' a'mwe gazarezare wawinya' sara kanoji dara wijalangesakade' “O, ange' madakegaa' wawinya' savine diraginya' sasare' daaka!” ¹⁴A'mwe pwai kwai likilya dazari nayaa madazavi dika manyi kyoji yi gamire wawinya'na tivikita nawi'nya' maaradelyi. ¹⁵A'mwe pwai gamire wawinyavi dika sa' kanasi'noji yi sarei tivikita sa' mamaari yadelyi. Sare kiri' anga made gami sari Gotiyai padaihasamaaradelyi. Kiri' angadikevi pwari magiropalama'daanyabaabi' dikevi kusawi Gotiyai sari padaihasamaaradelyi.

¹⁶Sarimi Gotiyare anga tewaanyasira. Yi Gotiyare Kuryai sariminyi wilayihimwaalikeihilyi. Sarimi daza'na myawirijiwaa'! ¹⁷A'mwe pwai kwai Gotiyare anga tewaanya' kayaaka yigalajai yi a'mwe dazari Gotiyai kayaaka yigalaladelyi. Gotiyare ange', sa' tewaanaange'nanyi. Gamiresira. Daza' yi sarimi saihilyira.

¹⁸Aka, a'mwe aane pwai kwai gami sarine'na kwaasi madinanna! A'mwe pwai sariminyi tinnyabanyai dahaasa saburi midinajai yi gannya simunyavi “Nimi simunya naangebwi kininnakeinyi yima'nima!” dozi sahwai ginyiwanna yoji Kwaakevakiyaburina simumaayai yima'nana! ¹⁹Sare' darevinyi. Gotiaryaba Kwaaka davakiya simunya yawita sabwi yi sa' siduta maaya navi'navikebuliyi. Daza'na Gotiyare bukuya' Gotiyarina dara dinikevinyi.

“A'mwe siduta yawi'nikeinera,” dadivisara kwaasiya yadaapiji

Kwaasiya sabwi yinahunyabulyi Gotiyai kayaaka yigaladelyi.

²⁰Nabaai yagaala dare kirisi dini!

“Naangei nayaa dara yawi'mani'

'Siduta yawi'nikeraavire simunya

Yi sa yaasiwa'nanyangi.’ ”

²¹Sarevidaa'nyi a'mwe aane pwai kwai a'mweraavine yaya namakiladika! Sare' darevinyi. Yuya yuya yi sariminyinengi. ²²Yi Polinyi dingaka? Yi Aapolizai dingaka? Yi Pitai dingaka? Yi Kwaaka datha' dingaka? Yi gaalyabwi dingaka? Yi baryabwi dingaka? Yi dahaa' warike dingaka? Yi divi yima'nade dingaka? Ai, yuya sa, yi sariminyinengi. ²³Nabaai sarimi Kiraazitiyareihilyi. Sabaabi' Kiraazitiyai sai Gotiyarelyi.

Gotiyare wawinya' yadivisaraavinesi.

4 ¹Sare'na neminyina Kiraazitiyarine yadaanyainavina a'mwei dara yawirana! “Sahwara Kiraazitiyare widaayadivisare. Yi Gotiyare

yagaala kuku'nya, nebulya' yoimavajalikurakya maremwaaidivi' wijiwaakadivisare.”² Sarevi maremwaaide wawinyavi kiwinya' kininnake! dara warikesi. Gyakwai maremwaala dare pwai kwari bi'delyi “Maremwaalyabwina nayaa pada'galalimwaga'dei daaka!”³ Nabaai niminyi sarimi kwaihi a'mwe pwara a'mweraavire kotiya' maryawibwarya'neinyi yi nimi daza'na yawirideinyi “Sa' maalitaayasira.” Nabaai nimi kwainyi ninnya sabwi maryawibwa'di “Tewaanyasira,” dadinyainyi mi'.⁴ Sare' aaya kaavilya' daresi. Nimire wawinya'na yiwetawakya aane piri' kiri' myawi'nyainyi. Sare kiri' nimi wi'na dara madiwina! Nimi a'mwe yida'maraangeinyira. Niminyina maryawibwarya'neinyi daaka! Aawa. Sabwi sa' wawinya yune Naangeresi.⁵ Sarevidaa'nyi Naangei walaabathehaa'na sinnawi sarimi aane piri' kiri' mamaryawibwapina! Walaabathehaa' sahwai sawisavi lika kima'nyawi yulyarike yi baakebanna marakadengi. Yoji sahwai yuyaraavire simunyabwi ku'maayabanna marima'naabathelyi. Yi dazagaa' sariki Gotiyari gazaizai yakevine tivikita maaradelyi.

⁶ Nya'mweihi, sariminyina yagaala dazangi ke'ba'na diwengi. Yi nimi sainyiji Aapolizalyi sinaarina ke'ba'na diwa. Sarimi saihi naariminyina yawi'divi' yi yagaala gavenna dinike mwavilapina! Nawi'nya yidasabwi dimidinyide'nanyi. Sara yadivi' pihadika nyipika! Wijiwaakadivisarajiya yaya pwarine'na makina, pwarine yaya' walamarakina yadivisa'na pihadika jideihi dingaka!⁷ Sare' darevinyi. Giminyi a'mwe naangei aaihwai gwakakaiginaka! Gotiyari mamaaryaginya kininnakeigire beningaka! Yi yuya sanna “Gotiyai yanga nyijaavadeinyi daakaji,” yune giminne yaya'na makimaniginya' be'na yivanigi! Gotiyari mamaaryadivitabaabi' be'na yivanigi!

⁸ Dahaa' sarimire kuryaraavi yunebanna tivi'na mena yihiwakeihi daaka! Dahaa' Gotiyare yuya kininnakeihiri kwaala piningina mena mihimudaasiwakeihi daaka! Nemi Apozeliyainaji maneye'mwannyadivi' kingiyailbi' Gotiyarina maremwaaimanigasaihi daaka! Aka! Nimi sahiri'na nyivu'niwa. Sarimi kingiyailbisaihi maremwaabizi kwaji “Apozeliyaina sarimiji yihye'mwannamaremwalaana!” dona sara kamwalaadika!⁹ Sare' darevinyi. Nimi dara yawi'manige. Gotiyai nemi Apozeliyainaavi maalikeinaavi nemwaaaha'. A'mwe pwaraavi kwaakewi nemwaaihakeine. Nemi dareinabisaine. A'mwera kotiya' mena yadivi' yi nemi nayaa balaade'na nejidavesaine. Sarevi yi sahwara neramakipi'de'na avaangwaasavi yuyaraavire tinnyari ejeliya kwaraavireriji a'mwe kwaraavireriji sara nemwaaihake'nanyi.¹⁰ Kiraazitiyarina wijiwakadaanya'na “Simumaayarera,” nedadivisaine. Kiri' sarimi “Kiraazitiyarina kunnakeinera,” didivisaihilyi. Nemi waryaanyaina, yi sarimi diraginaangeihi. Sariminyine yaya makidivisaihilyi. Yi neminyine yaya mamakilyadivisaine.¹¹ Yune dathahaa'na nemi wawinya yivanigo'na mijika mwaaيمانigo. Yadaa nemire kulalyangi wana yaalika neyihirasi'mani'.

Nabaai neminyi kwaabihannyanna negainivani!. Asa gwaamwadiwi' neminyi yaasiwa' maina neramamarivanigasaine. Yi sara neyadaapi nemi anga nayaa mwaalya'neba piba aawa. ¹²Nemi saina pwaraavi nemire wapaayanna myidaanganyadaa yagiyagi wawinya nebulya'na yune nennya asirajina yadaanyaine. A'mwera paasiyagaala nedangadaapiji yagaala nawi'nyanna ja'nawidadaanyaine. Sahwara neminyi wana kayaa'na neyigaidaapiri nemi kave nayaa tinnaina wanganna yadaanyaine. ¹³A'mwera walapapalakya yagaala kayaa'nanya yinahunya sawinne saza nedadaapiji nemi yagaalya kave widadaanyi. Kwaaka yuyawinna nemi wana yaaye tiritan'anya nebulya' yima'nadaanyaine. Yuyaraavire girikita'nanyaina mwaaiho. Nemi Apozeliyainaavire wawinya yadaanyavi sara kuna mwaaiho yimabaka nabaai dahaa'nanyira.

¹⁴Yagaala daza sariminyi wagila yihizaaya'ne' yida'mwe mi'. Aawa. Nimire kaimiraayaihirina tewaanya nyivu'nivanike'na yi "Kumire simunya nimi yawirarilaaya yima!" dena yida'mwengi. ¹⁵Sare' darevinyi. Kiraazitiyari wilamwaaahasavi nebulya'na sirigihivaanga kwala naanga naangera kininnakeihi mwaabizaihi kiri' sirinimaanga kwalaalyara maayaihilyi. Aawa. Gave pwalyi. Darevinyi. Nimi yagaala tewaanya' yihiziwaakevi Kiraazitiyai Jizaazari wilamwaaidivisaihirine sirinimaangeinyi yima'neinyi gaveinyi. ¹⁶Sarevidaa'nyi dara dihaa'bwata yihima! Sariminyine ke'ba'nanyainyi nimire sabwina limwadiwi' jamarila! ¹⁷Yi dazahirisavina sariminyawinna Timotiri marayihyasaabiwelyi. Sahwai Kiraazitiyarine nimire kaimiraayarina tewaanya nyivu'nadelyi. Naangerina limwannikelyi. Sahwai nimi Kiraazitiyari wilamwaaiheinyire tuta mididinyangi sarimire simunyavi ayahi maradihaa'bwata yihyathelyi. Anga yuyabanya yuya Kiraazitiyare kusilaanyaviya gazasavi nimi wijiwaakadinyabaabi' nimire sasare dazabwina yihithathelyi. ¹⁸Sarimijiya pwara "Neminyawinna Poli mabi yaka maneyavada'galyi yadelyira," yawi'divitabaabi' pihadika yeva kunnya yaya munyaba makinyina yiwaasare. ¹⁹Kiri' Naangei simunyavi sara yawiraja' sariminyawinna maalikegaa' bideinyi. Bi'mava'muji pihadika yadivisaraavire yagaala sannaniku' yaamiji wi'nide' gave' mi'. Aawa. Kumire diraginya' yidakwasanganideinyi. ²⁰Sare' darevinyi. Gotiyai nemaremwaaidevi yune yagaala gave' kadika mu'nyadaanyi. Aawa. Diraginaange' yadengiji tinna wangadaanyaine. ²¹Sarimi be yaawiabwina yihivu'nivani'? Dare da'na dahayihivu'niwa'? "Yisari' neminyi yavada'gala neya'neri' limwagozi neminyawinna bathe'nanyi." Dara dahayawi'mwaa'? "Nemi saina kyavada'gainawaaji sahwai tinna nengada kale yada kwaamu'nanyabulyi neminyawinna bathe'nanyi."

Girikita'nanyabwi Koridi mwaalyaraavi warake'nesi.

5 ¹Nimi nebwina dara wi'niwa. Koridi mwaalyara limwadivisaraavi girikita'nanyabwi warikesi. Yi nabaai girikita'nanya sa'

nabinyabulyi. Yi sasare sabwi ajimya yuyangiyara mu'nyadivisara “Aala!” dadivi! yadivita mi! Sa' daresi. A'mwe pwai sarimijiyai ganimaangere a'mwe! maarina. ²Sarelyiyaihi mwaalina yadivita kiri! “Nemirebwi teawaanya gavesira,” dadivi! pihadika yadivi! sarinnya yaya munyaba yaasiwa'na makinadivisaihilyi. Sare! mipina! Aawa. Kayaa'nanya sabwi yagalya'ma'na yapi sarimi kinna dizila! Yi “Nemi sasare sabwi yade sari neminyawidaasi widasaana!” dapiji kinna dizila! ³Sare! darevinyi. Nimi sainyi sariminyi menyaba mwaaideri kiri! nimore simunya'na sarimiji mwaaidinyainyi mena maryawibwa'mwesi. Yi sariminyaba mwaaihebaabi' yi a'mwei sarei dazabwina “Sai kayaa'na wagila yadelyi,” dena tivi'na maryawibwa'mwesi. ⁴Nimi tivi'na dara diwa. Naanga Jizaazai Kiraazitiyarine diraginyavi a'mwe dazari Saataanimina marimwangina jila! Yi sarimi yi'bwa'nawi'nadaapiyagaa' nimore kuryalyi nemire Naangei Jizaazare diraginyasi yihye'mwannamwaaladeihi ⁵Saataanimire maremwaalyabanna a'mwe dazari marimwangina jila! “Gamire yawisa' yavada'galakoji Naangere yirikeriki Gotiyai a'mwe dazare kuryari padaihasamaarana!” dapiji dimarimwangyila! Saataani daanga wijaavadevidaa'nyi gamire kilaakejikiya yawisangi kayaaka yigalade'na duthaasila!

⁶Sarimi Koridi mwaalyaihi sarinnya yaya munyaba makinadivi! “Nemi yida'nanyainera,” dadivisaihilyira. Kiri! yaasiwa'na sasara dadivisa' nawi'nyabwi mi! A'mwe dadivita dare'na myawirijivaniga! “Yiziya maalike' girikula yuyavina liwinya mimwadesi.” Nabaai, sabaabi' kayaa'nanya wanganakipija sariminyi yunebanna nayihiladawaradika! ⁷Sarimi “Biretiya gaala mudike'na yiziya maaya'neina mwalaana!” dapiji yiziya aya kigaasa nayaa dimarasi'nyila! Yi yiziya maayaihi mwaaihatabaabi' sara dimwaalyila! Sare! darevinyi. Yi Kiraazitiyai neminyine Pari'ma'munnevire sipizipiyai nemire kayaa'nanyabwi marasi'nya'nei balya'neri tamiravetabaabi' neminyine'na mena balakevi mudikeihi dimwaalyila! ⁸Sarevidaa'nyi nemi munnevi biretiya yiziya aya kigaasa maaya tika naana! Yi yiziya similika wilya'nesi yiziya wana kayaa'nanyasi tika manaana! Aawa. Biretiya mamimwannyyike' nayaa naana! Yi daresi. Nemire simunyavi yida'nanyabwi yunebanna newarana! Nemi yagaala nebulya'nanyanna nayaa daana!

⁹Pikariyikwiavi nimi sariminyi yihithave. Dara de. A'mwe a'mwengi ata limwadivisaraji nya'mwana madinyadivi' mye'mwannamwaabina! ¹⁰Nimi yuyaraavi wana yune nebulya' yagalya'mata'na majivanige. Yi a'mwe yuya Kwaaka davakiyara a'mwengi ata limwadivisaraavina dingaka? Tiganaaryaraji kuka yipalamaa'divisaraji saraavina dingaka? A'mwera kwaasiya gotiya yita, sila saraavirebwi mididivisaraavina dingaka? Yi sarimi “Sasare saraavi nebulya'na yagalya'mavaana!” dipija' yi sarimi Kwaakevakidaasi nayaa jahalya'mayideihi daaka! Yuya

saraavina myihizivanige. ¹¹Nabaai kiri' nimi yagaalyavi aaya kaavilya' yihithave' yi sa' daresi. A'mwe pwai kwai sarimi “Kiraazitiyarine neya'mwela!” dadivisari jahalya'mayila! Yi sarina a'mwengi ata limwadei dingaka? Sai tiganaaryai dingaka? Sai kwaasiya gotiya yita, sila saraavirebwi mididei dingaka? Sai biraiyagaala dadei dingaka? Sai nada yimaka widei dingaka? Sai gilyivita a'mwe pwaraavirengi mwagi'nadei dingaka? Yi sasarebura yajai sali sarimi nya'mwana mye'mwannayipina! Tika wapaaya a'mwe sasarelyi mye'mwannanipina! ¹²⁻¹³Sare' darevinyi. A'mwe mwasilaanyaraavi maryawibwarya'neinyi nimore wawinya' daaka! Sahwaraavi yune Gotiyaina maryawibwaradere. Kusilaanyaraavi sarimi maryawibwa'divisara midaaka! Yi sarimiresi. Dara dinikabaabi' jila! “Sarimi saihiridaa'nyi a'mwe kayaa'nanyabwi yaderi dimarasi'nyila!”

Kiraazitiyari limwaga'divisara kotiya mamarinipine'nesi.

6 ¹Sarimijiya pwai kwai sarimijiya pwari wija'na yagaalya' kininnakei Gotiyare tewaanyara yawibwarya'neraavi pari'ma'dei dingaka! A'mwe Gotiyarina yida'maraangera mamwaalyigasara mu'nyadivisaraayabanna kotiya' yaawadelyi. Sai sasare sabwina wagila muvwa'nyadei dingaka! ²“Gotiyare tewaanyara a'mwe Kwaakevakiya yuyaraavire sabwi maryawibwaranganya'neraavi sahwai wimwaaihaderera,” sarimi daza'na myawirijihivaniga! Nabaai divi sarimi a'mwe yuya Kwaakevakiyaraavi maryawibwapija' daha! yagaala maalika sarimijiyaremili' dazasare samili'na sarimi yiniga wi'na maryawibwapineih daaka! ³Yi “Nemi limwaga'daanyaina ejeliyaraavire sabwi kibulyi maryawibwaraadeinera,” sarimi dazavi myawiryivanigasaihi daa! Yi sarevi dahaasagaa' nimore mwaalya davuriya yagaalyangina nemi wi'na nebulya'na maryawibwaraanneine. ⁴Yi sarevidaa'nyi mwaalya davuriya yagaalya' kininnakeihi mwaabizaihi yagaala savi mwasilaanyara maryawibwarya'neraavi nadahilakipidika! Kiraazitiyare kusilaanyaviyaihi yawi'na “Sahwaraavire kuryara bainikera waryaanyarera.” Yi sahwaraavi sarimire kotiya'na be'na wimwaaihivanigataraavaka! ⁵Yagaala diwe daza' kadika wi'nipija' sarimirebwina wagila yihivwa'naja' yi sa' tewaanyasi. Sarevi sariminyidaa'nyi sirya'mwe saraari yagaalyavi yiniga maryawibwarannei aane pwai kwai midaaka! Simunnakei sariminyi tinnyaba mwaalikei pwai kwai midaaka! ⁶Sarimi yida'nanyabwina mamidinyivaniga'. Aawa. Neya'mwe pwai neya'mwe pwari kotiya maryadelyi. Yi nabaai Kiraazitiyari malimwagyadivisara kotiya maryawibwarya'neraayaba sara yadelyi. Tewaanyabwi daaka! ⁷Sarimi saihi kotiya marinadivisaihilyi. Yi sasare saburidaa'nyi Saataani yune yihithathiwamanikeihilyi. “Nemi kave baihana'na yadawaari kayaa'nanya' neya'mwe pwai kwai gaminna neyana!” maji baa'na yivaniga! “Baihana'na yadawaari nimore gilyivisa

neya'mwei nemwagi'nana!" maji be'na yivaniga! ⁸Sarimi sirya'mwerina yavada'galya'nebwi mabiramaarivaniga!. Aawa. Yune sarimi saihina kayaa'nanya' yadivisaihilyi. Pwaraavi kayaa'na yibwaakya' yadivi' gilyivisa wimwagi'nadivisaihilyi. Yi sasare sabwi sarimijiya sirya'mweraavi dazahwaraavi yadivisaihilyi.

⁹Sarimi dathavina myawirijiwaa! "A'mwe kayaa'nanyabwi yadivisara Gotiyare maremwaaide' sa' maapi'dera mi!" Akai, sarimi yune sarinnya simunyangina kwaasi nadakinipidika! Yi darebulyi. A'mwe yaasiwa'na maridaakunadivisaraji yi a'mwe kwaasi gotiya yita, sila saraavi mididivisaraji yi a'mwe pwaraavire a'mwengi ata limwadivisaraji yi a'mwera kayaa'nanya wagila wivwa'nya'ne a'mwe pwaraji ye'mwannayadivisaraji ¹⁰yi kukeraji yi tiganaarya yadivisaraji yi biyaaya pini nadivi' yimaka widivisaraji yi a'mwera a'mwe pwaraavi yagaabiraizika widangadivisaraji yi kuka yipalamaa'divisaraji a'mwe sasare yuya dazara Gotiyai maremwaaide' maapi'dera mi. ¹¹Nabaai sinnawi sarimijiya pwara dazabwi sasara mwaalesaihilyi. Kuna kayaa'nanya sangi mamwaaipineihilyi. Aawa. Naanga Jizaazai Kiraazitiyarine yayaviji nemire Gotiyare Kuryai kwariji Gotiyai aalya mena yihyada gaminne tewaanyaihiri mena yihimwaaiahada gaminyine yida'maraangeihiri mena yihithahilakakeihilyi.

Girikita'nanyaburinesi.

¹²"Yuya yiwija nimi ya'neinyi kimaakiya madakinyikengi." Kiri' nabaai nyimaremwaaloji yuya sa a'mweraavi wigaimwade mi'. "Yuya ya nimi ya'neinyi kimaakiya madakinyikengireva." Kiri' nabaai niminyi aane piri' kiri' yiwija' divi wila nanyiradika! ¹³"Tika wapaaya sa yi munyikinengi. Yi munyi' wapaaya maarya'niki." Sare kirivi nabaai Gotiyai wapaayasi nemire kilaakejisi yuyawaai yasi'nadelyi. Kilaaka saji'na yihithima! Kilaakeji' yaasiwa'na maridaakunyina ya'neji' mi'. Aawa. Saji' yune Naangerina widaaya'nejiki. Yi Naangei sai kilaakejikina maremwaalya'nelyi. ¹⁴Gotiyai bainikeraayawidaa'nyi Naangeri yidikaavakelyi. Yi nabaai diraginya' yune gannyavina nemire kilaakejika baidezikaaviji avaala sasara neyidikaavadelyi. ¹⁵Sarimi dara myawirijiwaa! "Sarimire kilaakejika yi Kiraazitiyare kilaakejikiya pimaginyajikera." Sarevidaa'nyi nimi Kiraazitiyare kilaaka pimaginya piji' maara'muji a'mwe kwalawa' ganaangevine kilaaka pimaginyaji' miwiridezi' daaka! Arikewinyi. ¹⁶Aawa. Sarimi davina myawirijivaniga! "A'mwei a'mwe yaaridaa'ne sasi yiraku'nemwaaloji yi sai a'mwe saviji avaaikilaaka yima'nadelyi." Sare' darevinyi. Gotiyai sare sa'na mena dara dakelyi "A'mwelyi a'mwesi sawaai kilaaka gave piji'na yima'nyikadezikira." ¹⁷Nabaai a'mwe pwai Naangelyi yiraku'nemwaalojiyi yi sai kuryai gave pwainanyai yima'nyikadelyira.

¹⁸Kayaa'na girikita'nanyabwi sarimi yagalya'ma'na yapiji likaanya diwila! Wagila yuya pini a'mwera yipija, sa kilaakejiki mwasimaginyangi. Kiri' a'mwe yaasiwa'na maridaakunyina yadei yi sai gannya kilaakejiki kusawinyavi kayaa'nanyabwi wijaavinadelyi. Sare'na sabwi mipinera!

¹⁹Sarimi da'na myawirijiwaa! “Sarimire kilaakeji' yi Kurya Tewaanyai wilayihimwaaalikere anga nawi'nyasi.” Gotiyarineba Kurya sai kininnakeihilyi. Sarimi sahwaihi yune sariminyineih mi'.

²⁰Aawa. Sare' darevinyi. Gotiyai nigwia naangesi sariminyi ayahi yihimubamaarakelyi. Sare'na sarinnya kilaakejikaavi Gotiyarine yaya' munyaba nayaa dimakilyila!

A'mwe kwala maarya'nebwinesi.

7 ¹Dahaa' pikariyikwiavi sarimi yida'mwa'daata a'mweraavire mwaalyabwina nimi dara ja'nayihithide'nanyi. A'mwei a'mwevi kwala mamaarya'ne' sa' yaasiwa' mwaalyabwi tewaanyasira. ²Sare kirivi dala piburana piburananya yaasiwa'na maridaakunanyinyabura a'mweraavi kayaaka ya'nebura warike'na gazaizai gami sarine gannya balaange' kininnakeinanyai mwaalana! Yi nabaai a'mwe gazasa' gannya a'mwei kininnake'nanyi' mwaalana! ³Gamire a'mwevi kwala maaryabwine tivikisa' kwalaangei nayaa wijaavana! Sasarebaaibi' gamire kwalaangeri tivikita sa' balaange' nayaa wijaavana! ⁴Sare' darevinyi. A'mwe' yune gannya kilaakejikina maremwaaidezi' mi'. Aawa. Kwalaangei maremwaaali'. Yi sasarebaaibi' kwalaangei gannya yune kilaakejikina mamaremwaalyi'. Aawa. Gamire a'mwe' maremwaaali'. ⁵Kirimi sayoihi kwaiyagaala dadisabwi nawi'nyabulyi. A'mweigi ginnya a'mwevi “Aala!” madinna! A'mwe'gi ginnya a'mweri “Aala!” madinna! Sara yikajavwi yi sa' kukebulyi. Kiri' pigaa'na piri' yima'nadehaa' dingaka? Kirimi sawaaihi avaaizimunya'na yakilyi kibawegaa' kirinnya kilaakeji' yitaata jji'nakilyi “Gotiyari wija'negaa' yune mwaalaka!” dakilyi geva geva dimwaalyideyoihilyi. Sa' wikira. Nabaai sara yakilyi dividaa'nyi sayoihi kirinnya kilaakeji' ayahi jiraku'nemwaalyideyoihilyi. Akai, sara mi yakilyi kirinnya kilaakejiki wi'na nayaa mamaremwaalyi yikaja! Saataani yaamiji yijiwaala nayihyadika! Nabaai sarevi ata limwangebwi nyikadika! Sare'na Gotiyari mi'na widakilyi ayahi jiraku'nemwaalyideyoihilyi. ⁶Diwe sa' kiwinya'bita' mi'. “Sara jila!” madakyivanige. ⁷Kiri' “A'mwe yuyara nimi yadinyabaabi' mwaabi'de' tewaanyasi,” simunya yawi'manige. Sara nyivu'nivani'. Sare kirivi Gotiyai tewaanya sihumale dala pininna pininnanya yanga wijaavakengi. A'mwe gazaizai Gotiyarina gannya sihumale' kininnakelyi. Pwarina a'mwe' kininnakei mwaalya'nebwi wijaavakesi. Pwarina a'mwe' maayai mwaalya'nebwi wijaavakesi.

⁸Kwala mamaaryaraji yi a'mwe yaanyiwaakemilikaji sangi nimi dara diwa. Sangihi nimibi' kwala mamaaryaihi mwaabiza' yi sa' tewaanyasi.

⁹Kiri! kunnya kilaakejisi simunyasi nayaa mamaremwaalyipija' yi kwala maarina yipika! Sare! darevinyi. Yaasiwa! mwaalina yapiji kumire munyi! dika widathe! kayaa'nanyasi. Yi kwala maapija' sa' nawi'nyasi.

¹⁰Kwala maaryaraji kwala maa'nyaji sangina nimi kiwinya datha' wijaavima! Kiwinya sa' nimire'na mi'. Aawa. Kiwinya sa' Naangeresira. Sa' yi dare'na "A'mwe' gannya kwalaangeri myagalya'mavanna!" ¹¹Kiri' a'mwe sa' gannya a'mweri mena yagalya'mavaja' yi daza' yaasiwa' mwaalina yade' dingaka? Gannya a'mweryawinna ayina wawoji kwalaangelyi avaaimunyi'na ayina ye'mwannamwaalyikade' dingaka? Pibwi aawa. Nabaai kwalaanga kwalyi gannya balaangevi mudaasanna!

¹²Nabaai kwaala piyuraavi nimi sainyi dara diwa. Yagaala sa' Naangei widaka' mi'. Nimiresira. Yi Kiraazitiyarine neya'mwe pwai kwai, yi gannya balaange! Kiraazitiyari malimwagyade' kininnakei mwaalajai yi a'mwe sa' "A'mwe salyi kuna ye'mwannemwaalima!" daza' yi neya'mwe dazai a'mwe sa' malimwagya'na savi myagalya'mavanna! ¹³Nabaai a'mwe piri' gannya kwalaangei Kiraazitiyari malimwagyadei kininnakei mwaalaja' yi a'mwe sai "A'mwe sasi kuna ye'mwannemwaalima!" dazai yi neya'mwe daza' a'mwe sai malimwagya'na myagalya'mavanna!

¹⁴Sare! darevinyi. A'mwei Naangeri malimwagyada gannya balaangesi ye'mwannemwaalajarina balaanga sa' Gotiyare tewaanya' mwaalake sasare savi kirimire mwaalyabwi tewaanyabwi yima'nake! Gotiyai tinna wangadelyi. Nabaai a'mwe' Naangeri malimwagyada gannya kwalaangelyi ye'mwannemwaalajavina neya'mwe sai Gotiyare tewaanyai mwaalake sasare savi kirimire mwaalyabwi sabwi tewaanyabwi yima'nake! Gotiyai tinna wangadelyi. Sare! mi waraji kwaji yi sarimire kaimiraaya girikita'nanyara kamwaaibithi! Kiri! dahaa' tewaanyara Gotiyareraavi wimwaaihaderera. ¹⁵Sare kirivi a'mwe pwai a'mwe kiri! Naangeri malimwagyada gannya a'mwe pirivi a'mwe kwari yagalya'mavaja' yi sa' wikira. Yagalya'mavana! Sasarebwi yima'najavi neya'mwe pwai neya'mwe kiri' yaasiwa'wawinya'bisavi mamwaalyi! Aane piri' kiri' wila myiryinikesi. Kwaamu'nanyaburi mwaalya'neihiri Gotiyai sariminyi jaka yihizivwaramaakevinyi. ¹⁶Sare! darevinyi. Sarere balaange'gi, nebulya'na gara yawi'manigi! "Ninnya kwalaangeri yiniga padaihasamaaride'nyi dingaka?" Sa' myawirivanigi. Nabaai kwalaangeigi, nebulya'na gara yawi'manigi! "Ninnya balaangevi yiniga padaihasamaarideinyi dingaka?" Sa' myawirivanigi. Sare'na madahalalimwadinna!

¹⁷Sare! kiri! Naangei gazarizari yanga mudakabaaibi' yi sahwai sara mwaaidi'nyiyavi Gotiyai jaka wijivwaramaakegaa' mwaalakeburi yi sai yune sahirisavina kuna yamaryana! Yuya Kiraazitiyare kusilaanyangiyaraavi nimi kiwinya sara wakadinyainyi. ¹⁸Dara diwa. A'mwe pwai kwai kilaakeji' gurya davesarina Gotiyai jaka

wijivwaramaarakei dingaka? Sahwai gannya kilaakeji' ayahi mamariwibwa'nanna! A'mwe pwai kilaaka gurya mada'nyinikeri Gotiyai jaka wijivwaramaarakei dingaka? Sahwai gurya da'nikei mima'nanna! ¹⁹Kilaaka gurya daya sabwi, yi sabwi gevulyi. Yi kilaaka gurya madaya sabwi, yi sabwi kibulyi gevulyi. Aawa. Gotiyai Kiraazitiyarine yagaala wakake midinyabwi yi sa' naangaangebulyi. ²⁰A'mwe gazaizai wawinya pirivi mwaaideri yi Gotiyai jaka wijivwaramaarakegaa' sai sahirivi yinahu nayaa mwalibainyina yana! ²¹Yaasiwa'wawinya widaayadinyaigi mwaaida'gizi Gotiyai jaka gizivwaramaarakeigi daaka? Dazavina gimi simunya' taanga maginanna! Aawa. Kiri' yaasiwa'wawinya widaayadinya' yagalya'maya'ne' tusa' kininnakeigi yima'nija' yi tuta dazavi midinna ji! ²²Sare' darevidaa'nyinyi. A'mwei yaasiwa'wawinya widaayaderi Naangei jaka wijivwaramaarakei yi dahaa' Naangere tewaanya mwaaidelyi. Yi Naangeri tinnyari sai kayaa'nanyabwine yaasiwa'wawinya ayahi widaayadei mi'. Sasarebaaibi' a'mwei tewaanya mwaalina, yaasiwa'wawinya mudayadaawori Naangei jaka wijivwaramaarakei yi dahaa' Kiraazitiyare yaasiwa'wawinya widaayadelyi. ²³Gotiyai nigwia naangesi ayahi mena yihimubamaarakeihilyi. A'mweraavire yaasiwa'wawinya widaayadivitali mima'nipina! ²⁴Nya'mweihi, gazaizai wawinya pirivi mwaaideri jaka wijivwaramaarakei yi sai wawinya' yune sahirivina Gotiyalyi mwaalana!

²⁵Nabaai sidiraaya kwala mamaa'nyangine' nyida'mwa'daasa'na dima! Nimi Naangere kiwinya sarevine' kuneinyi. Sare kirivi nimore simunyavina yawibwaride'nanyi. Naangei niminyi kale tewaanya nyada yi niminyi yiniga wi'na nyada nebulyabwi limwaga'dinyainyire yagaala nyu'nipineihilyi. ²⁶Sarevidaa'nyi dara yawi'mwa. Dahaa' dathahaasagaa' taanginya warikevi kwala mamaarya sare sabwi tewaanyabulyira. Yi dahaa' sarimi mwaaihatabaabi' kuna dimwaalyila! ²⁷Yi gimi a'mwe' kwala tivi'na maaraginyaigi a'mwevi yagalya'maya'ne'na tusa'na biribiryina minna! Yi gimi kwala mamaaryaigi a'mwe' kwala maarya'na myawi'dinna! ²⁸Kiri' gimi a'mwe' kwala maa'diza' sa' kayaa'nanyabwi jitheigi mi'. Nabaai sidiraaya' kwala maa'naja' sa' kayaa'nanyabwi yade' mi'. Sare kirivi "A'mwe kwala maa'napiji yi sahiyuraavi Kwaaka davaki taanginya nyima'nadika!" dena sariminyi yihivainya'neinyi diwa. ²⁹Nya'mweihi, sarevina nimi dara diwa. Yirikeri' yima'nadehaa' maalikegaa' yesima'nikegaaki. Yirika dathahaa' kuna wari'. A'mwe pwara a'mwe kininnakera kumi a'mwe maayarabi' Gotiyarina simunyavi yuneba nayaa yipika! ³⁰Nabaai a'mwe kinna divanigasara kinna majivanigasarabi' Gotiyarina nayaa widaayipika! Nabaai a'mwe yilaaya yivanigasara yilaaya myivanigasarabi' Gotiyari nayaa widaayipika! Nabaai a'mwe gilyivita mubamaa'manigasara kumi gilyivita maayarabi' Gotiyarina nayaa mwaabika! ³¹Yi a'mwe sahvara Kwaakevakineburana

yadivisara yuya sahiningi yune'na mamarayipina! Sare' darevinyi. Kwaaka dathavakine yuya warike daza yiwivanikengi. Sarevidaa'nyi yawita kwalaalya yawi'divisaihi mamwaaibina!

³²Nimire simunya sariminyine yi darengira. Yuyangina simunya kwalaalya myawiryadivisaihi dimwaaalyila! A'mwe kwala mamaaryai sai Naangere sabwina simunya nayaa yawi'delyi. “Naangeri wivu'nivanika sabwi yima!” dadelyi. ³³Kiri' a'mwe kwala tivi maarakei sai Kwaaka davakine saburana simunya kwalaalya yawi'delyi. Yi “Nimire a'mweviji wivu'nivanika sabwi yima!” dadelyi. ³⁴Sarevidaa'nyi gamire simunyabwi milikita yadewaalyi. Yi Naangerinaji gamire a'mwevinaji yuyawaarina yawi'delyi. Nabaai a'mwe' kwala mamaa'nyasi sidiraayasi Naangere sabwina simunya nayaa yawi'disawaalyi. “Nimire kilaakejikiji nimire kurya kwariji tewaanya! Gotiyare' yuna mwaalya'ne' sara yima'nana!” dadi' sara yawi'disawaalyi. Kiri' a'mwe kwala tivi maa'nike' sa' Kwaaka davakine saburana simunya kwalaalya yawi'desi. Yi “Nimire kwalaangeriji wivu'nivanika sabwi yima!” dadesi. ³⁵Nimi yagaala divanige datha' yi sarimi tewaanya mwaalya'nevi yihigaimwagya'nesi. “Kwala maaryabwina sariminyi nyigidiravemwaaaimudika!” dena yihithiwa. Aawa. Sarimi nayaa yida'na mwaalya'nesi. Yadi'vi' yuyagaa' Naangeri duthaayide'na sarimire simunyangi piniji piburaji yaasiwa' mwagi'namarya yihyadeihi mi'.

³⁶Kiri' a'mwe pwai gamire sidiraayavina dara yawiraja! “Nimi kwainyine sidiraaya' dahilakinikevi yida'nanyabwi mivanigeinyi. Yaasiwa'na mwaaiheinyi,” nabaai sahwai yune miginya naangei mena yima'naja' yi tusa' gaminyine piri' minyadori gami sara wanganaja' yi sai gannya simunyaburi midinana! Sarevi gaminyi kayaa'nanyabwi mi'. Kwala maa'nyina yika! ³⁷Kiri' a'mwei gannya simunyavi diraginna yawi'da sahwari “Yarala! Sara ja!” wija'ne mwari yada gannya simunyaburi gami sai yiniga wi'na maremwaalannei mwaaida yi sai gannya simunyavi tivi'na dara yawiramihakada “A'mwazidiraaya niminne dahilakinika sa' yaasiwa' saba kuna mwaalana!” yi sa' tewaanyasira. ³⁸Sarevi a'mwei gannya a'mwazidiraaya' maaraja' yi sai tewaanyabwi yadelyi. Nabaai a'mwei kwala mamaaryajai yi taanginyagaa'na sai tewaanaangebwi yadelyira.

³⁹A'mwe kirivire kwalaangei gaala kuna mwaaidori yi sagaa' a'mwe sa' gannya a'mwelyi yiraku'nemwaaidesi. Kiri' gannya kwalaangei se kabaloji a'mwe' ayahi piri' yiraku'nemwaaalanne' mi'. Sa' “A'mwe pwari kwala maa'nima!” dozi yi sa' kwala maa'nyina yade'na mwaaladesi. Nabaai sare kiri' mwasilaanyari mamaa'nanna! Naangerineri kwala maa'nana! ⁴⁰Kiri' sabwina nimi sainyi dara yawi'manige. Taanginya neyivanike'na sa' yaasiwa' kuna mwaalina yaja' yi gami yilaaya naanga yada tewaanaanga yinike' mwaaladesi. Nimi Gotiyare Kuryai

kininnakeinyi. Yi nimi kwainyiji Kurya Tewaanyai wilanyimwaalikeinyi diwa.

Miwisa kwaasigotiyari, yitazilyaraavi tamawijaavadivisaburinesi.

8 ¹Kwaasigotiyaraavina mubithika tamira'divita miwita pimagingyangina, nyida'mwa'daasangina, ja'nawidima! “Nemi yuyaina simunya' kininnakeinera,” yawi'daanyireva. Yi simunyabwina pihadikebwi yada yaya munyaba makinyaburi neyidikaa'desi. Kiri' nabaai kale neyabwina kuryaraavi yivaimwadesi. ²A'mwe pwai kwai gannya yaya' munyaba makinada dara yawirajai “Yi piri' kiri' nimi simunya mena yawi'nikeinyira,” yi a'mwe sare simunya yawisa nayaa yawirya'nei Gotiyai sara dakadevaabi'na myawiryadelyi. ³Kiri' a'mwe pwai kwai Gotiyarina tewaanya wivu'najai yi sarina Gotiyai dara yawi'nikelyi “A'mwe sai wavila'dei nimirelyi.”

⁴Sarevidaa'nyi sasare miwita tika nya'ne sabwina yi kwaasigotiyaraavina tamira'divita miwita pimagingina tika nyabwina nimi dima! Nemi dara yawi'daanyi. Kwaakevaki kwaasigotiya aane pwai kwai mamwaalyi'. Sa' yaasiwa' saba sana yavikaridaakwia yaasiwa'nanyangi. Sarevi yi gotiya kwalaalyara mi'. Aawa. Gotiyai gave pwainanyaina mwaali'. Pwara mi'. ⁵Sare' darevinyi. Sigunya pirivi Kwaaka kivaki kwalaalyanna Gotiyari mu'nyadivisara “Yi sahvara gotiyarera,” dadivisa mwaaidivisangira. Yi gotiya kwalaalyaraji maremwaidivita kwalaalyaraji mwaaihata ⁶kiri' nemi Kiraazitiyareina dara yawi'daanyi. Neminyine Nimwai Gotiya yune gave pwainanyai mwaali'. Sahwai yuyangina aaya kaavilyalyi. Yi nemi gaminyineina mwaaiho. Nabaai Jizaazai Kiraazitiyai Naanga yune gave pwainanyai mwaali'. Sahwai yuyangi wakyakelyi. Yi sahwai nevadaihasamaarakeinera. Yi sawhari nemi gaalyabwi kininnakeinera.

⁷Kiri' nabaai a'mwe yuyara pwaraavi Kiraazitiyareraavine simunya daza' muwarikesi. Pwara kigaa' mwalyaasaburina sinnawinya kwaasigotiyareburi midinibainesare. Sarevi sahvara kuna yawi'divisare “Miwita da' kwaasigotiyarine yidika yivanigasa' nebulya'nanyasira.” Sara dadivi' kiri' miwita sa tika nyina yivanigasare. Kumire simunya waryaanya' yune nayaa myawiryada sara nadiwi' simunya kwalaalya yawi'divi' kumire simunyai dada “Kwaasigotiyarine miwisa' gimire yiwetawakya sanna yiwaa,” kumire simunyai girikebwi maa'manikerera. ⁸Kiri' tika wapaaya nya'neina neminyi Gotiyarina gidikusaba nemakwode mi'. Tika wapaaya sa nemi nya'na Gotiyai simunya kwalaalya yawi'dei mi'. Nabaai nemi tika manyaaja' yi nemi Gotiyare tinnyari kayaa'na mwalaadeina mi'. Yi nemi tika naaja' yi nemi Gotiyare tinnyari nawi'nya mwalaadeina mi'. ⁹Kiri' sarimi mala nayaa jiwannyila! Akai, sasare sabwi sarimire diraginya' waryaanyaraavi nyadi'de'na sa' a'mweraavire

sivilyangi wirinadaasi diraginya mi yadivi' yi sahwara wagilyavina walaraawina nyipidika! Sare'na mala nayaa jiwannyi! ¹⁰Sare' darevinyi. A'mweigi simunya' kininnakeigi, yi gimim kwaasigotiyarina yi'bwa'nemwaaividisabanna mwalaawija' miwita nadaa'gizi yi a'mwe pwai kwai gamire simunyai waryaanyalyiyai sai giminyi gwanganaja' yi sare sa' kwaasigotiyarine tika sa nija savi gamire simunyarididikaata jithei daaka! ¹¹Sare' darevinyi. Sarei pibwi yawi'dei kiri' tika naja'na yi gimire simunya diraginya sa' a'mwe sari, diraginya maayari kayaaka jihaidelyi. Yi sai neya'mwe dazarina Kiraazitiyai mena balakelyi. Yi dazahwari padaihasamaarya'nei mena balakelyi. ¹²Neya'mweraavi kayaa'nanyabwi dazara yapiji yi kumire simunya waryaanyai yaderi jinga tamajirakapiji yi sasare saburi Kiraazitiyariji kayaa'nanyabwi sara jidelyi. ¹³Sasare'na tika wapaaya nya'nebwi niminyi nya'mweri wagilyavi walamarakaja' yuyagaa' aaya yiwawajahaa'na miwita sa tika maniwina! Arikewi. Akai, niminyi nya'mweri mi yiwija' sai wagilyavi nalaraawadika!

Apozeliyaraavire diraginyaji yipineji sanginesi.

9 ¹Sareinyi Polinyi Kiraazitiyarina aane piri' kiri' wila nyipwiyadeinyi daaka! Nimi Apozeliyainyi midaaka! Jizaazari nemire Naangeri tinna mena wanganeneinyi midaaka! Naangeri, nimi wawinya yevidaa'nyi yi sarimi gamireihi midaaka! Sare'na a'mwera nimire simunyavi yide' madahalanyilimwabineinyi. ²A'mwe pwara niminyina yawi'diviki "Sai Apozeliyai mika!" Kiri' nimi diwa "Gesira." Aawa. Sarimi nimi Apozeliyainyina tivi'na nyawiramaa'diviki. Sare' darevinyi. Sarimi Naangeri wilamwaaighasa' yi sa' diraginna dara wijiwaainyasi. Sarimi niminyine' Apozeliyaraavire yavikwajikesiyaihilyira. Yi "Naangei nyidasaawadeinyi," nebulya'nanyaihilyi.

³A'mwe pwara nimire wawinya'na kotiya maanga didivisaraavi nimi kumire yagaalyangina ja'nawidadinya' daresira. ⁴Nemi Apozeliyaina neminyine wawinya'na a'mwera nerivikiryana'neraavi wapaayaji aalyaji maraannenna yidaanganya'ne diraginya' kininnakeina midaaka! ⁵Apozeliya pwaraji Naangere gahwaalaangeraji Pitalyi sara kumire balaange neya'mwe Kiraazitiyareji ye'mwannayamarivanigatabaabi' dinegaimwagyide'na nemi sara yaanne' diraginya' kininnakeina midaaka! ⁶Nimi gaveinyiji Baanavaazalyi sainaai asasi wawinya' yagalya'mavakwoihiji sarimire nigwia maarakane' diraginya' kininnakeinaai midaaka! ⁷Aamiyavi mwaaidehaa' aawilasai gannya nigwiji gilyivisaji biramaa'de bewalaka! Pwai wapewawinya burida gannya tika wapaaya pimaginya mamaranyade be a'mwelaka! Pwai bulimakaawoyangi maremwaaida gannya maremwaaidengire aamunya pimaginya manyade be a'mwelaka! Sabaabi' nimire wawinya'na maamujavwi nawi'nyabulyi.

⁸ Sarengina nimi a'mweraavireburaavina mididi dahathivanigena. Yi nabaai Kiwinya kiri' sara madinyike' dingaka! ⁹ Yi sare' darevinyi. Ne Mozizare Kiwinyavi dara yida'nikesi. Bulimakaawoyara witzila bwalaraawina ya'nera witiyangi sivila lilivivainada'daapi tika manya'neraavi maangevi wila mavwiyinnera! Sare' jaakegaa' simunya' yune bulimakaawoyaraavina yawiryaaeki daa!! ¹⁰ Aawa. Yi nemi kwainaavinaji yune diragina dakakei daaka! Yo, neminyine'nanyi. Sare' darevinyi. Pikarya sa' dinike' nemi dara yawiranganya'nanyi. A'mwei wawinyavi likilikya yadaaworiyalyi yi a'mwei tika wapaaya mya mena yinnike maarojiyalyi saraai dara yawirikaja! "Ninnya wapaaya pimagingya niminyine maarya'neinyi wawinya yima!" ¹¹ Neminyine' dare'nesi. Nemi sarimire simunyangi Kuryarena yihiburidovaabi' kuryaraaviya tewaanyanna yihimakabyo. Sarevi tivikisa'na sarimi neminyi kilaakejikiya negaimwagya'neihi mari'bwarakaajavaabi' gilyivisa nejaavipine' naange' daaka! ¹² A'mwe pwara gilyivisanna sariminyi yihyidaangadivita diragina' kininnakera mwaaihasa'na nemi sareina sinnawi yihyoina naanga yiniga maraanneina daaka!

Sare kiri' gilyivita daza nemi yiniga wi'na maraannengi sare nemi mamaaryagongi. Aawa. Nemi dara do. Neminyina pwai kwai nyawiradika! "Polimiva nigwia mwagi'namaarya'nera Kiraazitiyare yagaala tewaanya' nyidadivisarera." Sarevidaa'nyi yagaala sa'na "Aala!" dima! "Yi yawita savi tusa' kaanya tihiraana!" dona negainadennaji taanginya pininna pininnanyannaji diragina daako. ¹³ Ayina yihithima! A'mwera Gotiyare Angevi wawinya yadivisara Gotiyare Angeviya wapaaya maa'divisare. Kwaraanyaba Gotiyarina mubithika yira'divisavire wawinya yadivisara saviya miwita pimagingya maranadivisare. Yi sarimi dazavina myawirijivaniga! ¹⁴ Sasarevidaa'nyi, nabaai Naangei kiwinya da' wakakesi. A'mwera yagaala tewaanya' wijiwaakadivisaraji yagaala sa' maa'manigasaraavi gilyivita kilaakejiki gaimwagya'ne maapika!

¹⁵ Sare kiri' nimi diragina aane piri' kiri' marayadinyainyi mi'. Sariminyi myihidaanganye. Yi nabaai "Dahaakigaasi sariminyi pini sara maarima!" dena yagaala daza pikarya midayiwa. Aawa. Sare' darevinyi. Nimi mamaarya'na yilaaya yivanigeinyi. "A'mwe pwai nimire yilaaya yadinyavire aaya kaavilya' namarasi'nadika!" dadi mijike'na mena balide' yi sa' nawi'nyasi. Kiri' yagaala tewaanya' wijiwaake'na tivikita maa'muji kwaji sa' nimire yaya munyaba makinyabwi kayaaka kigaladike' yi sa' kayaa'nanyasi. ¹⁶ Sare' darevinyi. Nimi yagaala tewaanya' wijiwaakadinya'na nimire yaya' munyaba makimujavire aaya kaavilya' mwari'. Sare' darevinyi. Sa' mujiwaakya'ne' tusa' piri' minyi'. Aawa. Naangei wawinya sa' nyakakeinyi. Sare' darevinyi. We! Yagaala tewaanya' mujiwaakiwija' kale nyadeinyi. Yi sara myiwija' wana kayaa'na

mwaalideinyi. ¹⁷Sare' darevinyi. Nimire simunyavidaasi wawinya daza' yiwiji kwaji yi nimi tivikita maarya'neinyi kyidaangamudika! Kiri' wawinya daza' nimire simunyavidaasi mivanigeinyi. Wawinya sa' ya'neinyi Naangei kanyidahilaka' sara yivanigeinyi. ¹⁸Sarevidaa'nyi nimire tivikita berivaka! Nimire simunya' "Gimi yadinya' tewaanyasi," divanike tivikita daresi. Yagaala tewaanya' wijiwaakadinyavine gilyivisa yiniga wi'na maa'muneinyi yi sa mamaari yadinyainyi. Yagaala tewaanya' wijiwaakadinyavire diraginya kininnakeinyi kiri' sare' "Aala!" dena "A'mweraavi yagaala sa' yanga wijaavideinyi," dena sara yiwa. Yi sara yadinyavine yawita daza' nimire kuryarine tivikisasi.

¹⁹Sare' darevinyi. Nimi tewaanya mwaaiheinyi. A'mwe aane pwai kwareinyi mi'. Sareinyi kiri' yuyaraavine yaasiwa'wawinyainyi sara wakineinyi. "Yi a'mwe Gotiyarine kwalaalyaraavi naanga mijama'muma!" dadi sara yadinyainyi. ²⁰Sarevi yi "Juyaraavi maarima!" dadi Juyaraavire tinnyari kumirebwina Juyainyibi' mwaale. Nimi sainyi Mozizare Kiwinyavi kwaakewi mula'narige kiri' "Kiwinyavi kwaakevi mwaaihasaraavi maarima?" dadi sahwarayaba Kiwinyavi kwaakewi wilamwaaheinyibi' yima'niweinyi. ²¹Sabaabi' nimi Gotiyare kiwinya' maayainyi mi'. Aawa. Kiraazitiyare kiwinyavi kwaakewi wila'na'dinyainyi. Sareinyi kiri' a'mwe Kiwinya' maayaraavire tinnyari mwaaidi "A'mwe Kiwinya' maayaraavi maarima!" dena nimi sainyi a'mwe Kiwinya' maayainyibi' yima'neinyi. ²²"Nabaai a'mwe diraginya maayaraavi maarima!" dena sahwarayaba nimi diraginya maayainyi yima'niweinyi. Nimi a'mwe yuyaraayaba sahwaravirebura yadi "Pwaraavi padaihasamaarima!" dena tutaanya yuyangi yaamiji yadinyainyi. ²³"Yagaala tewaanyaviya nawi'nyaburaavi a'mwe pwaraji ye'mwannamaarima!" dadi yagaala tewaanya savina yuya daza yadinyainyi.

²⁴Sarimi davina myawirijivaniga! Gavamarasi'nyikaanyabanna a'mwe yuyara sara kaanyave'na wodivita kiri' gave pwaina wavila'nikere' maa'delyi. Kaanyave'na wodei kaanyave'na nayaa diraginna wodevaabi' "Gotiyari wavila'nikere tewaanya' maraana!" dapiji kaanyave'na diwila! ²⁵Yi a'mwe gazaizai gavamarasi'nyikaanyangina "Wavilavima!" dada kilaaka diraginyaji' yima'nya'nei yuya kilaakejikiya sabwi walamarakatelyi. A'mwe dazai tivikita kayaaka yigainade'na "Maarima!" dada sasara yadelyi. Nabaai kiri' nemi tewaanaange' kayaaka minyade' maarya'neina kwaasi kwaasi yaadeina daaka! ²⁶Sarevina nimi sainyi yaasiwa' maranganamarya myadi kaanyave'na wodinyainyira. Gavamarasi'nyiramyavi asa gwaamwada asa yihusavi yaasiwa' malivaramamaryadevaabi' Gotiyarina diraginna yadinyainyi. ²⁷Sara yaasiwa'na myadinyainyi. Aawa. Nimire kilaakeji' nayaa diraginna ya'nejisi malya' nebulya'na tadinyi. Nimire kilaakeji' nimire kuryare

yaasiwa'wawinya yadei yima'nya'nejiki diraginna walamarakadinyainyi. Akai, a'mwe pwaraavi wijiwaakadi “Kiraazitiyareihi yunebanna diraginna limwagarapiji wavila'nikere tewaanya' Gotiyare' dimaaryideihilyi,” wijiwaakadinya kiri' kanyawiranganoji mamaari nyiwidi'de'na nimire kilaakeji' diraginna walamarakadinyainyi.

“Nemi yijiwaalyaburi nalarawaadika!” dinike'nesi.

10 ¹Sare' darevinyi. Nya'mweihi, yagaala dangi sarimi navika ya'na nimi simunyavi “Aala!” diwa. Yuya nemire aataravaavi Ne Mozizai Kwaaka Yizipidaasi makabadaa'nyi sahvara yiraaya' maremwaalakevi kwaakewi wila'divi' kaanya yamaryesare. Yadiivi' yuyara yune sivilyajina saalaalyavi tewaanna wilaawesare. ²Sara yadiivi' yuyara sahvara bavitaaziya' maaresare. Yiraaya saviji saalaalya saviji sawaari yi bavitaaziya daza' Mozizalyi ye'mwannamwaalya'ne' wakinikesi. ³Yi yuyara sahvara wapaaya Gotiyare Kuryai wjavadaasiya nesare. ⁴Yi yuyara sahvara aalya Gotiyare Kuryai wjavadaasiya nesare. Sare' darevinyi. Sahvara Kuryare aalya' silaangeri nyina. Silaanga sahvari Gotiyare Kuryai wjavadaasiya silaanga sai kuminyi midinna yada yi sai Kiraazitiyalyira. ⁵Gotiyai nawi'nya yada sare kiri' kumirebwina sawhai kuminyidaa'nyi kwala naangevaaki yilaaya mwigalya'. Sare' darevinyi. Kwaaka a'mwera maayavi saba gazabazaba balesare.

⁶Yi yuya daza neminyine ke'ba'nanya yima'nakengi. Kuminyi kayaa'nanyabwina sara wivu'nakabaaibi' neminyi kayaa'nanyabwina nevu'nadeina kyima'naadikevi ke'ba'nanya yima'nakengi. ⁷Sahwaraavi tinnyabanya pwara yetabaaibi' sarimi kwaasigotiyare sabwi mamidibina! Yi sahwaraavina dara dinikabaaibisasi. A'mwera tika munne wapeyidika naanga savi walamwaaidivi' tika wapaaya aalya nadiivi' kwaasigotiyarine yilaaya'na kwarame avaanna girya'nera daavesarera. ⁸Sahwaraavi tinnyabanya pwara yetabaaibi' nemi kayaa'na girikita'nanya sabwi myaanna! Yi Gotiyai sinna tika wida'daa'nyi yirika gave piriki sarera kwala naangera 23,000 saba sana balaramarina yesarera. ⁹Nabaai sahwaraavi pwara “Kwaamu'na kuna mwaaladei dingaka!” deva Naanga kwari yijiwaaletabaaibi' sari yune yijiwala myaanna! Sareraavi kamaalyara tika davina kye' sahvara saba sana yu'daramarina yesa'nanyi. ¹⁰Nabaai sahwaraavi pwara kinimyagaala detabaaibi' sarimi Gotiyarina maamayagaala madipina! Sareraavi ejeliya a'mweraavi tamakadei karamaka' yi sahvara saba sana yu'daramarina yesa'nanyi. ¹¹Yuya daza ke'ba'nanya yawirya'neinaavina kigaakuna a'mwe sahwaraavi yima'nakengi. Kayaa'nanya avaalya nyaadi'de'na neminyi simunya nejaaya'ne yagaala daza Gotiyare bukuyavi yida'nikengi. Yi yuya kigaasa mi'nanyi. Neminyina dividaa'nyinaavina dahaa' mwaaihoinaavi

dazagaasa aaya kaavilya neyima'nakeinera. ¹² Sarevidaa'nyi a'mwei gami sai yawi'manikei “Nimi sainyi diraginaangeinyi. Diraginya nayaa yadinyainyi daa'dinyainyi.” Sai kayaa'nanyaburi nalaraawadika! Sai nayaa mala yiwannana! ¹³ Yaamiji yijiwaalyabwi yihima'naabadevwi yi sa' mudika piri'bita' mi!. Aawa. Sa' avaainanya' a'mwe yuyaraavi yima'nadevaabisasi yijiwaalya!. Yi yijiwaala savina Gotiyai gannya nebulya'nanya diraginya' mididelyi. Sahwai limwaga'delyi. Sahwai sarimire diraginyavi nayihwawilavadi'de'na yijiwaala piri' wanganakadei mi!. Aawa. Yijiwaalyabwi sariminyi kayihima'naabozi yi sarimi savina dithathivalyide'na gaimwanga yihya'ne tusa' Gotiyai biryakadelyi. Tuta daza' yi sa' dare'na. Sahwai diraginya pada'galayivaimwanga yihyadelyi. Yi sarimi yijiwaalyaburi diraginya yiniga wi'na dithaayideihilyi.

Kwaasigotiyaraavire tika munnesi Naangere nadaanyasi sawaarinesi.

¹⁴ Nya'mweihirina tewaanya nyivu'nadeihi, sasarevidaa'nyi kwaasigotiyare sabwina likaanya diwila! Bule'na duzaayila! ¹⁵ Sarimi simunya' kininnakeihiri dara yihithivanige. Sareihi nimore yagaala kwaasigotiyare yilaayavina nayaa dimarayawibwarila! ¹⁶ Naangere yi'binyavi nadaanyagaa' kaapiya tewaanya naanga yanga kininnakerina nemi Gotiyari “Su! Su! Gimire yaya' makimanigo,” widadaawori yi kaapiya sai Kiraazitiyare tawesi neminyi maraneyi'bwarayirakurakadei midaaka! Yi biretiya gunyanadaanya daza' neminyi Kiraazitiyare kilaakejisi ye'mwannaneyi'bwarakade' midaaka! ¹⁷ Biretiya sa' gave piri'nanya' warike'na nemi a'mwe kwalaalyaina yune kilaaka gave piji'na mwaaihoinera. Sare' darevinyi. Nemi yuyaina biretiya gave piri'nanya sahirivina nadaanyainera. ¹⁸ Sarimi Yizireliyare Kilaakejikidaa'nyaraavina jawiranganyila! Gotiyarina mubithika yira'divisara kwaraanyabanne miwita nadivisara yi sawara Gotiyalyi ye'mwannemwaaidivisara midaaka! ¹⁹ Sarevidaa'nyi nimi yagaala gara divanige? “Kwaasigotiyare tika wapaaya sa' nebulya piri' kiri' dingaka? Ge' dingaka?” nabaai “Kwaasigotiyai gami sai nebulya'nanyai pwai kwai dingaka?” ²⁰ Aawa. Nimi dara divanige. Naangerina mu'nyadivisara ajimya yuyangiyara yidika yira'divita tika munne sa yi Saataanimire yimakeraavina yira'divitangi. Gotiya nebulya'nanyarina yira'divita mi!. Yimakeraji sarimi ye'mwannemwaalya'neihi jima'nyide'na nimi simunyavi “Aala!” diwa. Sareihi nyima'nipidika! ²¹ Naangere kaapiyariji yimakere kaapiyariji aalya ye'mwannanya'na sarimi yiniga wi'na nipineihi mi!. Aawaawa. Nabaai Naangere wapeyi'binyaviji yimakere wapeyi'binyaviji wapaaya ye'mwannanya'na yiniga wi'na nipineihi mi!. Aawa. ²² Yi sara yaaja' neminyina Naangei similika wilade' yaade'na daa! Nemire diraginya' gamire diraginyavi wawilavade' dingaka?

²³ “Yuya ya kimaakiya madakinyikengireva,” kiri' yuya sa a'mweraavi wigaimwade mi!. “Yuya ya kimaakiya madakinyikengireva,” kiri'

yuya ya sa diraginya pada'galayivaimwange' neyade mi'. ²⁴Sarevina a'mwe aane pwai kwai nayaa pada'galamaremwaainya' yune gami sarina myanna! Aawa. “Nimi sara yiwijavi a'mwe pwaraji nayaa mwaabikaji,” a'mwe yuyara nayaa pada'galamaremwaainipika! ²⁵Yuya miwita sa sitiwaayavi mubadivita sa sarimi navi'na nyina jila! Sarimire simunyara padaihirakaderaavina yidaanganya aane pimili' kimili' mipina! Yuya sa dinyila! ²⁶Sare' darevinyi. Dara dinikesi. Kwaaka dathavasi yuya yunewinna waraka yunebanna milemwaalikeji sa yune Naangerennanyangi. Sare'na yuya naanne' wikira. ²⁷Nabaai a'mwe pwai kwai Kiraazitiyari malimwagyadei “Wapaaya naade'nana!” dazai kagithozi yi gimi sari kadika yina ya'gizi wina yaja' giminyi gizaavaja gazasa' tika wapaaya miwita sa' navi'na nyina ja! Gimire simunya padaihirakaderina “Miwita da' gawidaa'nyavaka?” yidaanganya minna! Yuya sa dinana! ²⁸Sare kirivi a'mwe pwai kwai dara yihithaza! “Miwita da' nemi naade' davanyaraavire gotiyaraavi wijawaasasi,” yi sare sa'na yihithathe a'mwe dazarinaji simunyai padaihirakyarinaji sarimi tika sare' manipina! ²⁹Nimi yune gimire simunyai padaihirakyarina majivanige. Aawa. A'mwe sahwai githazai yi dazarerina divanige. Sare' darevinyi. Kiraazitiyareinyi yuya yiniga wi'na niwineinyi kiri' a'mwe pware simunyarika kayaaka nyigaimudikaji sagaa' maninna! Sare'na nimire diraginyabwi yiwija' pwara simunyai maranyawibwaraja' tewaanya beri'na maarideinyaka! ³⁰Yi nimi Gotiyari “Su! Su!” wida'muji niwine' tewaanyasi. Kiri' “Su! Su!” widiwija daza'na pwara biraiyagaala nyidipi'de' tewaanya' beri'nanaka!

³¹Sarevidaa'nyi sarimi tika wapaaya nadaapiji dingaka? Aalyaji nadaapiji dingaka? Nabaai pini yadaapiji dingaka? Yi Gotiyarine yaya' munyaba makilya'ne'na yuya sa jila! Sarimi piri' kiri' yipija'na Gotiyarine yaya' munyaba makilaja' gave' sara jila! ³²Yi Juyaraavinaji Girikiyaraavinaji Gotiyare kusilaanyaviyaraavinaji kave jila! Sahwara kayaa'nanyaburi walarya'nebwi kininnakeihi nyima'nipidika! Sahwara kayaa'nanyabwi yawiry'a'neraavi numwaaihipidika! Sahwara Gotiyarera yima'nya'neraavina sarimi sasarebwi nyipidika! ³³Nimi kwainyi a'mwe yuyara yiniga wi'na yuya sabwina tewaanya wivu'nade yuya sara yadinyainyi. Yune nimi sainyina gaimwannya'ne yadinyainyi mi'. Aawa. Nimi “Gotiyai a'mwe kwalaalyaraavi padaihasamaarana!” dadi sahwaraavina gaimwagya'ne yadinyainyi.

11 ¹Nimi kwainyi Kiraazitiyari yawirangadi ke'ba'nanya sahwari wimididinyainyi. Sasarebaabi' niminyi yawirangadivi' ke'ba'nanya sahwainyi dinyimidinyila!

Gotiyari yilaayagaa' a'mwe kawaaka yi'nadivisa'nesi.

²Sarimi yuyagaa' niminyina yawi'divi' yuya yagaala daza maa'di yihizaavadinyabaabi' nayaa limwaga'divisa'na yi nimi diwa. Sarimi

tewaanya nebulya'nanyabwi yadivisaihilyi. ³Nabaai sare kirivi “Sarimi yagaala datha' yawipika!” simunyavi yawi'manige. A'mwe gazaizare minyaginya sai yi Kiraazitiyalyi. Yi a'mwevire minyaginyai yi gannya a'mwelyi. Yi Kiraazitiyare minyaginyai yi Gotiyalyi. ⁴Nabaai a'mwe gazaizai gannya minyaginyavi bwakinaroji pigaa' Gotiyari yagaala widazai, yi pigaa' Gotiyarine yagaalya' wi'nawijiwaakajai, a'mwe dazai gannya minyaginyavi wagila wijaawa'. Aaya kaavilya' daresi. Sara yajai gamire minyaginyai Kiraazitiyari bwakakaja'na pwari kwaakewi mwaaladelyi. Kiraazitiyari kwaakewi mwaaladei mi'. ⁵Nabaai a'mwe gazasa' gannya minyaginyavi mabwakaki yaja' pigaa' Gotiyari yagaala widaza', yi pigaa' Gotiyari wi'nawijiwaakaja', sa' kirisi gannya minyaginyavina (gannya kwalaangerina) wagila wijaawa'. Sare' darevinyi. A'mwe sare' a'mwe kayaa'nanyavina wagila wijaaya'ne'na mijata yuya davakwikwiryadivitabaabi' avaina yiwa'. ⁶Sare' darevinyi. A'mwe' Gotiyari widathehaa' gannya minyaginyavi mabwakakya yaja' yi nabaai savi gamire mijasa' tu'na dawasi'nipika! Kiri' a'mwevire mijasa' tu'na dawasi'nya piri' davakwikwiryari kiri' yipija'na wagila nuwua'nadi'de'na yi sa' gannya minyaginyavi bwakinarana! ⁷Sare' darevinyi. Yi a'mwei gannya minyaginyavi mabwakakanna! Sarei Gotiyare ke'ba'nanya nawi'nyimaraangelyi. Gotiyare byaanna diraginya' yijiwaainadelyi. Sare kiri' a'mwe' a'mwere byaanna diraginya' yijiwaainadesi. Sare' a'mwe' gannya minyaginyavi bwakakana! ⁸Sare' darevinyi. Gotiyai a'mweri a'mwevire kilaakejikidaa'nyi myavikaryaa'. Aawa. A'mwevi a'mwere kilaakejikidaa'nyi yavikaryaakesi. ⁹Nabaai sare' darevinyi. Gotiyai a'mwevina yawiraka yavikaryaakai mi'. Aawa. A'mwerina “Sahwari wigaimwagatheva!” daka yavikaryaakesi. ¹⁰Sarevi ejeliyara tinna wanganya'ne' a'mwevire minyaginyavi diraginya' kininnake' mwaalana! Sa' a'mweri dalaangewi mwaalikesi. ¹¹Sare kiri' Naangeri wilamwaaihovi a'mwenna mwaaidivi' a'mweraavine maaya mi'. Yi a'mwerana mwaaidivi' a'mwengine maayara mi'. ¹²Sare' darevidaa'nyinyi. Gotiyai a'mwevi a'mwere kilaakejisi yavikaryaakabaabi' Gotiyai sara dakakevina dahaa' a'mwevire kilaakejiki a'mweri maa'desi. Yi Gotiyai sai a'mweraji a'mweji piniji sa yuyangi aaya kaavilyalyi. ¹³Sarimi saihi yagaala daza' nayaa dimaryawibwaryila! Yi yilaayagaa' a'mwe' gannya minyaginyavi mabwakaki yoji Gotiyari widaza', yi sa' nawi'nyabwi daaka! ¹⁴Nabaai nemi Kwaaka davakine a'mweinaavire sabwi yi sariminyi dara yihibwaridaakuvani' “Nabaai a'mwei mijata saaminyasiyai yida'nanyai daaka! Wagila wivwa'manikei midaaka!” ¹⁵Nabaai a'mwe' mijata saaminyasiya' yi mijata daza' gannya byaanna diraginya' midaaka! Gotiyai gamire minyaginyavi bwakinarya'ne' mijata saaminaange' nayaa wijaavakesi. ¹⁶A'mwe pwai kwai a'mwe mabwakinarya'ne

sahiri'na “Gavamarasi'nyiyagaala dima!” dazai, yi nimi dara widideinyi. Gotiyari yilaaya yaadehaa' nemi sasare sabwi kuneine. Nabaai Gotiyare kusilaanyangiyaraji sasare sabwi kunerera.

Naangei balakevine yawisa'ne aalya, wapaaya nadivisa'nesi.

¹⁷Sinnawi yihithiwa. Tewaanya nebulya'nanyabwi yadivisaihilyi. Sariminyine yaya' munyaba yihimakimwa. Kiri' dare'na sara myihizivanige. Sarimire yi'bwa'nawi'nya savina tewaanya kwalaalya mima'nyadengi. Aawa. Kayaa'nanya kwalaalya yima'nadengi. ¹⁸Sare' darevinyi. Aayagaa' nimi savidaasi da'mujiyainyi. Sarimi Naangere kusilaanyaviyahi yirakuramwaaaidivi' yaasiwa' milikasamarya yadivisaihilyi. Nimi yagaala daza' sara wi'nivanige. Sara wi'nena yagaala dazavina maali'na limwamwa. ¹⁹Sare' darevinyi. Gotiyai “Sariminyidaa'nya pwaraavi nimi yawiradahilakyara ku'maayabanna yima'naabipika!” kadozi sarimire tinnyari sahvara tewaanyara mwaabi'de'nanyi. ²⁰Sarevidaa'nyi sarimi yuyaihi Naangeri yilaaya'na avaalyaba yi'bwa'nemwaaaidivisagaa' Naangere wapaaya dinyide'ne wapaaya mi'. ²¹Sare' darevinyi. Sarimi yuyaihiri gazaizai yime'nya'bi' yada yi gannya wapaaya maa'da tika nadelyi. Sara yadivi' mye'mwannanyadivi' pwai miji'na mwaidaasi yi pwai wapaayaji aalya waainiya nyina yada yimaka widelyi. ²²Gatha'darevinaka! Yi sarimi wapaaya aalya nya'ne ange kuneih dingaka! Sarimi dara dahayawi'maniga! “Gotiyare kusilaanya sa' yaasiwa'nanyasira.” Yadivi' neya'mwe pwara wapaaya maayaraavina sarimi wagila wijaavanigasaihi daaka! Sa'na nimi yagaalya' gara yihithijiwana! Nimi sariminne yaya' munyabanna yihimakilijihyiwa! Aawa! Yuya dazanna yadivisa'na sariminne yaya' makilideinyi mi'. Sariminyi yihizidavideinyi.

²³Sare' darevidaa'nyinyi. Nimi Naangeri yagaala da' maarena sariminyi mena yihizaave. Yagaala daza' yi daresi. Yi sawisavi Juthaazai Jizaazari yikamaangeraavire asiri marimwangakegaa' yi dazagaa' Naanga Jizaazai biretiya' maaraka ²⁴Gotiyari, suya widakegaa' gunyina yaka dara wida' “Datha' yi sariminyineba nimore kilaakejikira. Niminyina yawiryanehi kuna sara jidevulyi.” ²⁵Aya sahibaabi'na kumi tivi'na nevegaa' yi sai kaapiyai maarina yaka wida' “Kaapiya dathai yi ninnya tawe' yagaala yihilimwagarika mudikesi. Gazagaasagaa' sarimi sahwarinya' dinyidehaa' niminyina yawiryanehi nayaa sara jidevulyi.” ²⁶Sare' darevinyi. Gazagaasagaa' nipijahaa' sarimi biretiya daza' nadivi' yi kaapiya dazariji nadivi' yi dazagaasagaa' Naangei mena balake'na wibwaridaakwadivisaihilyi. Sarimi sana sana yiwina yapiji yune gami bya'negaa'nanyi.

²⁷Sarevi yi nabaai a'mwe simunya' nayaa myawiryojiyai Naangere biretiya daza' yaasiwa' tika maranajai Naangere kaapiya dazariji

yaasiwa' maranya yajai sai sa' dara yadelyi. Naangere kilaakejikinaji tawejikinaji kayaa'na yadelyi. Sara yaja dazavina yi gami yiwetawakya kininnakelyi. ²⁸ A'mwei gannya simunyavi nayaa yawiramaarana! Tewaanya yavada'galayawiroji biretiya daza' sai yiniga wi'na nana! Yoji kaapiyariji wi'na nyina yana! ²⁹ Sare' darevinyi. Naangere kilaakeji'na nayaa mamaryawibwari yaja'na, "Sa' naangaangesira," myawiri yaja'na sai wapaayasi aalyasi tika yaasiwa'na nyina yada sarei yiwetawakya' maaradelyi. Yi sahwari jidavadelyi. ³⁰ Sarevi sariminyi a'mwe kwalaalyara wirita mwaaidivi' nalaaya kininnakere. Nabaai pwara baryavi se mena wakasare. ³¹ Tika manyagaa' nemire simunyavi nayaa maryawibwaraaja' yi yiwetawakya sa' neyima'nade' mi'. Nejidavade' mi'. ³² Yi Naangei nemire sabwi maryawibwa'da yi kayaa'nanya' nerivikiraja' yi daza' sai neminyi marayida'mata neyivanikelyi. Sara neyaja sa' "A'mwe Kwaakevakiyabulyiyaraaviji maneye'mwannajidaya'nei nye'mwannajidavadika!" dozi sara neyavada'galadelyira.

³³ Nimire nya'mweihi, sarevi yi sarimi "Tika naaji," yi'bwa'nemwaalapiji yuya pwaraavina nayaa pizi'gwa jemwaalyila! ³⁴ Nabaai pwari mijika wiyaja' sai gannya angevi nadelyi. "Neminyi nanemaryawibwaradika!" dapiji sarinnya yi'bwa'nemwaalyagaa' nayaa sara jila!

Yagaala pimagingya kuna warikenna dividaa'nyi sariminyawinna bi'mava'muji yi nimi yida'mawakideinyi.

Kurya Tewaanyare sihumale dala pininna pininnanyannesi.

12 ¹ Nya'mweihi, nyida'mwa'daasa'na Kurya Tewaanyai yanga nejaavade sanna sarimi navika ya'na simunyavi nimi "Aala!" diwa. ² Sarimi mena dara yawi'maniga'. Sinnawi sarimi ajimya yuyangiyaihi mu'nyadivisaihi kuna mwaaleva yi dazagaa' Saataani kwaasigotiyaraayawinna yagaala majadivisaraayawinna yihimwagi'namakwawakeihilyi. Sara yihyadaa'nyi sarimi likadike' galarilavimwaaihinikeihi midinna yesaihilyi. ³ Sarevi nimi sariminyina simunya' dara yihizaavanige. Aane pwai kwai Gotiyare Kuryai wilamwaaidei yagaala widadei dara dannei mi' "Jizaazari Dikevi Gotiyai wimarasi'nya'nelyira." Nabaai a'mwe aane pwai kwai dara maji yannelyira "Jizaazai Naangei." Aawa. Kurya Tewaanyari wilamwaalajai yi sai sara dannelyira.

⁴ Kurya Tewaanyare sihumale dala pininna pininnanya jaapainya'ne warikengi. Sare kirivi sihumale sa yanga nejaavadei Kurya gave pwainanyalyira. ⁵ Yi widaaya dala pininna pininnanya jaapainya'ne warikengi. Naangei gave pwainanyari yuya sa widayadaanyalyi. ⁶ Wawinya ya'ne diraginya dala pininna pininnanya jaapainya'ne warikengi. Sare kiri' Gotiyai gave pwainanyai a'mwe yuyaraavina

diraginya sa wijaavadelyi. Yi sahwai yuya saraavi yuya wawinya sa yiniga wi'na yannelyira. ⁷Yuyaraavi gaimwagya'ne'na Gotiyai gazarizari Kuryare diraginya' marima'naabadelyi. Yange wijaavake ku'maayabanna yibwaridaakwadelyi. ⁸Sare' darevinyi. A'mwe kwarina Kurya Tewaanyai a'mweraavina simunya tewaanyabwi yibwaridaakwia'ne diraginya' wijaavadelyi. Nabaai a'mwe kwarina Kurya gave pwainanya dazai yagaala wijiwaakya'ne diraginya' Gotiyare sabwina a'mwera nayaa yawiramaapi'de'na sa' wijaavadelyi. ⁹Nabaai Kurya gave pwainanya dazari a'mwe kwai diraginna limwangebwi maaradelyi. Yi sahwai “Sasare' ya Gotiyare diraginyavi yaanneinera,” dada sara yadelyi. Nabaai gave pwainanya Kurya dazari a'mwe kwai nalaavinakeraavi nawi'nya yavada'galya'ne diraginya' sihumale maaradelyi. ¹⁰A'mwe kwarina diraginyangi wawinya ya'ne wijaavina. A'mwe kwarina Gotiyari wi'nawijiwaakya'ne diraginya' yanga wijaavina. Gotiyare Kuryai yagaala wijaaya nedadivisaraaviji yimakera yagaala wijaaya nedadivisaraaviji siduta maryawibwaranganya'ne' a'mwe kwarina wijaavina. Yagaala ge gengi aaya kaavilya myawiryade wija'ne' a'mwe kwarina wijaavina. Yagaala ge gengi aaya kaavilya myawiryade marija'ne' a'mwe kwarina wijaavina. ¹¹Yune Kurya gave pwainanya dazai sihumale yuya daza marima'naabya'nei yadelyi. Yune gannya simunyavina mididehaa' yanga piri' a'mwe pwarina yi yanga piri' a'mwe pwarina sana sana maryawibwa'devaabi' jaapaidelyi.

Nemi yuyaina kilaaka gave piji'nanyajikiyainaavinesi.

¹²Gotiyare Kuryai diraginya yanga nejaavade sare' darevinyi. Kilaakejikine ke'ba'nanya' daresi. Kilaaka saji' gave piji'nanyaji' yaka kiri' a'mwe pwari kwalaalya warikejiki. Yi kwalaalya warika kiri' sa yuya kilaaka gave piji'na warikejiki. Sasarebaabi' Kiraazitiyai kwai kilaaka gave piji'nanyai kwai kwalaalya kininnakei mwaalikelyi. ¹³Sare' darevinyi. Kurya gave pwainanyai bavitaaziya' neyakevidaa'nyi kilaaka saji'na gave piji'na yima'noinera. Yi Juya pwara Girikiya kwara, yi yaasiwa'wawinya pwara kumire wawinya maremwaaidivita kwara, yi nemi geina geina kilaaka gave piji'na yima'noinera. Nabaai Kurya gave pwainanyari aalya'bisari yuna nya'neinaavina sahwari nejaavakeinera.

¹⁴Sare' darevinyi. Kilaakeji' saji' gave pimaginya'nanyaji' mi'. Aawa. Kwalaalyimaginya kininnakejikira. ¹⁵Yi sivilya' dara daza' “Nimi ata'nyi mi'. Sarevi yi nimi kilaakejikiya pimaginya'nyi mi',” yi sarevina daza' kiri' sa' kilaaka pimaginya' kuna waradesi. Yagaala sare' daza'na mi'. ¹⁶Nabaai kadiki' dara daza' “Nimi tinnainyi mi'. Sarevidaasi nimi kilaakejikiya pimaginyainyi mi',” yi sarevina daza' kiri' si' kilaaka pimaginyi' kuna waradiki. Yagaala sarevina mi'. ¹⁷Kilaaka yuyaji' saji' yune tinnyainanyai waraji kwaji kadika gatha'dara ku'nadikejikaka!

Kilaaka yuyaji' yune kadiki'na yima'naji kwaji tirinyavi gatha'dara kwinnadikejikaka! ¹⁸Kilaakeji' sasareji' mi'. Aawa. Gotiyai simunyavi sara yawirakabaabi' kilaakejiki pimagingya gazarizari nayaa wakaka yuya kumi sangi kumirebanna wakakejiki. ¹⁹Nabaai kilaaka yuyaji' yuyimaginya avaala pimagingya' yima'naji kwaji yi kilaaka nebulyaji' gawi warikejikaka! ²⁰Kiri' sasare' mi'. Aawa. Kilaaka pimagingya kwalaalya kininnakejiki. Sara yaka kiri' kilaaka gave piji'nanyajiki. ²¹Nabaai tinnyai asiri yiniga wi'na widannei mi' "Yi gimi mwarija' gaveinyi warideinyi wikira." Nabaai minyaginya kiri' sivilyavi widanne' mi' "Gimi mwarija' nimi gave'nyi waride'nyi wikira." ²²Aawa. Kilaaka pimagingyanna nemi yawi'daanya "Kumi diraginya mi'," daza mwaryadori yi kilaakeji' nawi'nya waradezi' mi'. Aawa nebulyasi. ²³Yi nemire kilaaka pimagingya nemi yawi'daanya "Kumi waryaanyangi. Maalikengi," nemi yiwaala naanga nayaa baazi'ma'nadaanyi. Nabaai kilaaka pimagingya "Nawi'nya mi'. Sangina majadaanyangi," wagila mamaarya'neina nemi yuyagaa' yulyakadaa nawi'nya maremwaidaanyaine. ²⁴Nemire kilaaka pimagingya nawi'nyangina sarebwina mugainyadengi sara myadaanyangi. Aawa. Gotiyai yuya kilaakeji' ye'mwagakya yakelyi. Yi kilaaka pimagingya' yi savine yaya' kwaakebanna warike' yi savine yaya' munyaba naanga makidelyi. ²⁵Sara yade sa' yi kilaakeji' pimagi pimagi najaapainadi'de'nanyi. Aawa. Yuya kilaaka pimagingya yuya kilaaka pimagingyangine'na avaina nayaa maremwaalibiza sara yipi'de'nanyi. ²⁶Nabaai kilaaka pimagingya' daanga wivinaja' kilaaka yuyaji' daanga yunewinna bavinigulina yadeziki. Nabaai kilaaka pimagingyavine yaya' munyaba makilaja' kilaaka yuya pimagingya sa yilaaya ye'mwannamaaradeziki.

²⁷Yi sarimi saihi Kiraazitiyare kilaakejikira. Yi sarimi yuyaihire gazaigizaigi gamire kilaaka pimagingyaji'ginyi. Yi yuyaihi pimagingyajiki. ²⁸Nabaai Gotiyai Kiraazitiyare kusilaanyavi pwaraavi wakakelyi. Aaya munyabanyara Apozeliyara Naangei Widaasadera, ayawidaasara Gotiyari wi'nadivi' a'mweraavi wijiwaakya'nera, dahasaai dahaasara wijiwirya'nere. Sahwaraavi dividaasara diraginyangi ya'nera, ayahi dividaasi nalaavinakeraavi tewaanya yavada'galya'nera, yi a'mweraavi gaimwanga ya'nera, yi wawinya dala pininna pininnanyangi maremwaalya'nera, yi yagaala nabinabinya myawiryadivi' kiri' ja'nera. ²⁹Gatha'darevaka! Yuyara Apozeliyara daaka! Yuyara Gotiyari wi'nawijiwaakadivisara daaka! Yuyara wijiwiriyadivisara daaka! Yuyara diraginya ya'ne diraginya' kininnakera daaka! ³⁰Yuyara nalaavinakeraavi nawi'nya yavada'galya'ne yanga kininnakera daa! Yuyara yagaala myawiryara dadivisara daa! Yuyara yagaala sa yiniga wi'na maridadivisara daa! Aawa. ³¹Sare kiri' yanga naanga sanna "Diraginna yawiramaraana!" dadivi' dimwaalyila!

Tewaanya wivu'nadevurinesi.

Yi dahaa' gave piri'nanyabwi nebulya'nanya nawi'nyaangebwi sinnawinyabwi dawwi yihibwaridaakuma!

13 ¹Nimi Gotiyare yagaalya' a'mweraavire yagaala dala pininna pininnanyangiji yi ejeliyaraavire yagaala kiningiji myawiryadinyangina a'mweraavi widiwija' kiri' sahwaraavina tewaanya manyivu'nyaja' yi nimi sareinyi beloya giringi'devaabisainyi. Gwarewa' jaka yaasiwa'na yinnigodevaaibi' aaya kaavilya maayainyi waryaanyainyi wididevaaibisainyi. ²Nabaai nimi Gotiyari wi'nadi pwaraavi wijiwaakya'ne yange kininnakeinyi mwaaimuja', yi yuya simunya Gotiyare nebulya, yagaala kuku'nya yoimavajalikurakya sa yawi'muja', yi yuya yawita pini kiniji kininnakeinyi mwaaimuja', yi nimi yawi'na "Gotiyai mugunya sa makwannelyi," sara wija'ne diraginaanga limwanga nebulya'nanya' kininnakeinyi mwaaimuja', sare kiri' a'mweraavina tewaanya manyivu'nyaja' yi sarevi saba sana yaasiwa'nanyainyira. ³Yi nabaai nimi "Nimire yaya' munyaba makinima!" da'muji nimire gilyivita yuya a'mwe gilyivi'maayaraavina yanga mudina yiwija', yi nimi nimire kilaakeji'na "Gotiyare yikamaangera dikevi maranyirapika!" diwija' marimwanginyina yiwija', sare kiri' a'mweraavina tewaanya manyivu'nyaja' yi sarevi aane piri' aane kiri' yiniga wi'na nyigaimwagatheinyi mi'.

⁴A'mwe pwai pwaraavina wivu'nadei sai kwaamu'nanyabwi wiadelyi. Yi wivu'nade sai pwaraavi bwiwanna wigaimwadelyi. Yi sai pwaraavirennaji pwaraavireburanaji tiganaarya myadelyi. Yi wivu'nade sai gaminne yaya' makinadei mi'. Yi sai pihadika yadei mi'. ⁵Yi sai kayaa'na mi, wagilyabwina yadei mi'. Yi sai yune gannyanna, gannyabwina simunya kwalaalya yawi'dei mi'. Yi sai simlika yarai widei mi'. Yi sai gaminyi kayaa'na wiadivita sanna ata magilyada sanna kuna yawi'dei mi'. ⁶Yi sai pwara kayaa'nanyaji yiwetawakyaji yadivisanna yilaaya yadei mi'. Aawa. Nebulya'nanya yadivisanna yilaaya yadelyi. ⁷Yi sai gaminyi yuya kayaa'na wiadivita sabwi yarai tiviki'dei mi'. Yuyagaa' sai diraginna limwaga'delyi. Yuyagaa' Gotiyarina "Nyigaimwagana!" dada kave yemwaaidelyi. Yuya taanginya sangi diraginna daa'delyi.

⁸Gotiyarinaji pwaraavinaji wivu'nya dazabwi yiwawodevwi mi'. Aawa nebulyasi. Sabwi kuna waragodevulyi. Yi Gotiyari wi'nawijiwaakadivisabwi Gotiyai kunebwi wakadevulyi. Yi yagaala nabinabinyangi myawiryadivi' dadivisabwi ji'mwannadevulyi. Yi simunya tewaanyabwi yawiramaa'divisabwi Gotiyai kunebwi wakadevulyi. ⁹Sare' darevinyi. Dahaa' nemi pimili'na maali'na yawirangamanigo. Nabaai Gotiyarina pimili'na maali'na wi'nawijiwaakivanigo. ¹⁰Sare' kiri' dividaa'nyi yiniga wi'nanyabwi

yima'naabathehaa' yi dazagaa' Gotiyai yuya pimili'na maali'nanya kune wakadelyi. ¹¹ Sinnawi nimi kaimiraaya maalikeinyi kuna mwaalena yi dazagaa' kaimiraayai dadevaabi'na yagaalya' daheinyi. Nimi kaimiraayai yibwakidevaabi'na sara yibwakineinyi. Nimi kaimiraayai simunya' yawi'devaabi'na sara yawireinyi. Yi nabaai a'mwe naanga mena yima'nena kaimiraayamilikaavire sabwi mena yagalya'maveinyi. Yi sabwi kunebwi wakeinyi. ¹² Sare' darevinyi. Dahaa' Gotiyarebura nayaa myawiranganyivanigo. Yi sinimwavananya kayaa'nanyavi nemire sinnyi' kayaa'na yennadaanyabaabi' nayaa myawiranganyadaanyi. Dividaa'nyi aayagaa' yi nemi Gotiyare sinnyiki nebulya'na wanganaadehaa' Gotiyarebura nebwiina yawiranganaadelyi. Dahaa' nimi pimili'na maali'na yawi'manige. Divi gami niminyi nebulya'na nyawiranganakabaabi' nimi nebulya'na yawiranganideinyi. ¹³ Dahaa' divi diraginna limwagasabulyi, Gotiyarina yemwaalyabulyi Gotiyarinaji pwaraavinaji wivu'nyabulyi dawaai data daza yuyagaa' waragothengi. Nabaai dawaai data sangiya wana naangebwinanyabwi sa' yi Gotiyarinaji pwaraavinaji nevu'nadevulyi.

Kurya Tewaanyare yangewaarinesi.

14 ¹ Pwaraavina tewaanya yihivu'nyabwi yuyagaa' kuna diraginna dimidinyila! Nabaai sarimi Kurya Tewaanyare sihumalenna maarya'na “Diraginna yawiramaraana!” dadivi' dimwaalyila! Nabaai sare kiri' yanga naange' “Gotiyari wi'nawaaji pwaraavi wijiwaakya'neina yima'naana!” diraginna dadivi' dimwaalyila! ² Sare' darevinyi. A'mwe yagaala nabinabinyavi sihumale' kininnakei dadei sai a'mweraavi yagaalya' mujadelyi. Aawa. Sai yune Gotiyarina widivani'. Sare' darevinyi. Yagaala dazavi a'mwe aane pwai aane kwai mu'namaaryadivisasi. Gamire kuryari nebulya'nanya kuku'nya yulyakaja dadelyi. ³ Kiri' a'mwe Gotiyari wi'nawijiwaakadei sai a'mweraavi widadelyi. Yi a'mwe dazare yagaalya' sa' diraginya pada'galayivaimwadesi. A'mwera tewaanya ya'ne sabwina dihaa'bwa'desi. Kale wiadaa'nyiyaraaviji taanginya wiadaa'nyiyaraaviji wigaimwadesi. ⁴ A'mwe yagaala nabinabinyavi sihumale' kininnakei gami sari diraginya pada'galayivaimwannadelyi. Kiri' a'mwe Gotiyari wi'nawijiwaakadei sai aangyagaala Kiraazitiyare kusilaanya yuyavi diraginya pada'galayivaimwadelyi. ⁵ Nimi simunyavi dare'na yawi'manige. Sarimi yuyaihi yagaala nabinabinya wija'neihi jima'nyide' tewaanyasi. Kiri' nabaai diraginna dare'na yawi'manige. Sarimi yuyaihi “Nemi Gotiyari wi'nawijiwakaana!” dapiji jima'nyide' nawi'nya tewaanaangesi. “Kiraazitiyare kusilaanyaviyara pada'galayivaimwangebwi maapika!” dozi a'mwe yagaala nabinabinya dadei yagaala daza maridazai yiniga wi'na yadelyi. Sare kiri' yagaala daza pwaraavine'na mamariji yajai yi

Gotiyari wi'nawijiwaakadeibisai yiniga wi'na yadei mi'. Aawa. Gotiyari wi'nawijiwaakadei sai gave pwainanaanga nawi'nyaangelyi.

⁶Nya'mweihy yagaala datha'na nayaa jawirila! Nimi sariminyawinna wiiwijainyi yagaala nabinabinya yihithiwija' gatha'darevi yihigaimwagideinyi! Aawa. Gotiyai nyibwaridaakwade piri', simunya nawi'nya' yawiranganya'ne kiri', Gotiyari wi'nayihiziwaakya piri', yihiziwaakya kiri' yihithiwija' nayaa yihigaimwagideinyi. ⁷Darebaabisasi. Gaala maaya, gware piri' piradaza kiri' nabaai sa kiniji avaala sasarengi. Nabaai a'mwei gware piri' piradaza kiri' kayaa'na dina yada sa' yagaala yaasiwa'na dina yadengina “Akai, savire yagaalya' nemi kadika nayaa pada'galawi'nya' gatha'darevaka!” dadaanyi. ⁸Sare' darevinyi. Yi nabaai pwara jaka ge'bi' kayaa'na danganna “Yarala! Mala pinaana!” yipija' kadika wi'noji malya'na maryoviravalimwagata yadei aaihwilaka! ⁹Sarimi kwaihilyi sasarebaabisasi. Sarimi taalisi yagaala nawi'nya yida'na muji yipija' sarimire yagaala dazavire aaya kaavilyavi gatha'dara yawirangabi'deraavaka! Aawa. Sare' darevinyi. Sara mi yipija' sarimire yagaalya' yihusavi saba sana yaasiwa' yiwina yadevaabisasi. ¹⁰Nebulyasi. “Kwaakevaki yagaala kwalaalya ge ge dahawarikajinyira.” Yagaala aane piri' aane kiri' yaasiwa'nanya' mi'. Yagaala yuya sangina aaya kaavilya' kininnakengi. ¹¹Sarevidaa'nyi a'mwe pware yagaala aaya kaavilya' nimi myawiranganyi yiwija' yi sai niminyina dara yawiradelyi “A'mwe maa'maataali'minnyalyira.” Yi nabaai nimi kwainyi yawirideinyi. A'mwe yagaala diwaka dazai sai maa'maataali'minnyalyira. ¹²Sarevi sarimi kwaihilyi yagaala pwara nayaa yihu'nipija' tewaanyasira. Sariminyi Kurya Tewaanyare sihumale yanga maarya'neihiri nawi'nya yihivu'nivani'. Yi sareihi “Nawi'nya nebulya'nanya sa naanna yaana!” dapiji Kiraazitiyare kusilaanyaviyaraavi diraginya divada'galayivaimwagyidevina kyihivu'noji Kurya Tewaanyari sara jithaanganyila!

¹³Sarevidaa'nyi yi a'mwe yagaala nabinabinya' widazai sai “Yagaala sa' maridima!” dozi Gotiyari diraginya savina nayaa widana! ¹⁴Sare' darevinyi. Nimi yagaala nabinabinya' Gotiyari widiwija' yi nimire kuryai sai Gotiyari widathelyi. Sare kiri' nimire simunya' sa' kune' yaasiwa' warina yadesi. Pwaraavi wigaimwagya'ne' yima'nade' mi'. ¹⁵Sarevidaa'nyi nimi gara yijiwana? Nimire kuryalyi Gotiyari widima! Nabaai kiri' simunyasi Gotiyari kaavinake' nayaa widima! Nimire kuryalyi Gotiyari daata dima! Nabaai kiri' simunyasi daata kaavinake' nayaa dima! ¹⁶Sarevi yi'bwa'namwaaidivisagaa' gimmi sara mi yija' yune ginnya kuryalyi kaavimaaya' Gotiyari suya widiza' a'mwe pwai angwangwei mwaaloji yagaala daza' myawiranganyi yadei gimire suya daza'na “Naanga nebulya' sahirisi,” gatha'darevi dathelaka! Sai yagaala widiza daza' myawiranganyi yade'na sa' yiniga wi'na yade' mi'. ¹⁷Sare'

darevinyi. Gimi suya' tewaanna widiwaanya' kiri' widiwaanyavina a'mwe kware simunya' diraginya mavada'galayivaimwagi yiwaa. ¹⁸Kwalaalyagaa' yagaala nabinabinyangi dadinyainyi. Pigaa'na pigaa'na sarimi yagaala sangi dadivisaihilyi. Yi sarevi nimi Gotiyai nyigaimwadaa'nyi sahware suya widiwa. ¹⁹Sare kirivi dara yawi'manige. Kiraazitiyare kusilaanyavi "A'mwe kwaraavi wijiwirima!" da'muji yagaala simunyavinanya ata pwinanya dide'na "Yo," diwa. Yagaala nabinabinyaviya kwala naanga naanga (10,000) dide'na "Aala!" diwa.

²⁰Nya'mweihi, yagaala nabinabinya dadivisavina sarimi sarinnya simunyangi kaimiraayamilikabi' kuna mamwaaibina! Aawa. Kayaa'nanyaburina yadivisa'na sarimi bwaranyamilikabi' nayaa dimwaa'yila! Sare kiri' sarimire simunyangina a'mwe naangerabi' yuneihi nayaa jima'nyila! ²¹Gotiyare bukuyavi, Kiwinyavi, dara jida'nikesi.

Naangei dara divani'

"A'mwe yagaala pinijiyaraavire maangevidaasi

Menyaraavire maangevidaasi nimi widideinyi.

Davanya datharaavi nimi widideinyi.

Sarevi kiri' sahware nyimidibi'dera mi!"

²²Sarevidaa'nyi yagaala nabinabinya ja sabwi yiniga wi'na yijiwaainya daza! Gotiyari diraginna limwadivisaraavina mi'. Aawa. A'mwe diraginna malimwagyadivisaraavine yakesi. Kiri' Gotiyari wi'napiji pwaraavi wijiwaakya sabwi yiniga wi'na yijiwaainya daza! Gotiyari malimwagyadivisaraavina yaka' mi'. Aawa. Sa' yune limwadivisaraavine yakesi. ²³Sarevidaa'nyi Kiraazitiyare kusilaanyaviya yuyaihi yikabina yapiji yiraku'nemwaaibiza' yi yuyaihi yagaala nabinabinyangi dipija' a'mwera angwangwe pwara malimwagyadivita kwara wilaabipijara kadika yihu'nipija' dara dipi'de' midaaka! Sarimi yimakyagaala divanigava! ²⁴Kiri' sarimi yuyaihi Gotiyari wi'nawijiwaakipija' a'mwe malimwagyade pwai angwangwe kwai kusawinna kulaabozi yuyaihire yagaalya a'mwe dazare simunyavi wiloji yi yuyaihire yagaalya sari kotiya maryadaa'nyi sahware gannya kayaa'nanyanna yawiradelyi. ²⁵Sahware simunyavi yuya lika yulyariki yi ku'maayabanna yima'naabathe sarimire yagaalya'. Yi nabaai sarevi sai gannya sinnyiki kwadaai giloji yi Gotiyarine yaya' munyaba makiladelyi. Yi dara jalikurakadelyi "Naanga nebulyasi. Gotiyai sariminyi tinnyaba mwaalika!"

Yuyabwi Kiraazitiyare kusilaanyavi nayaa yida'na yima'nade'nesi.

²⁶Sarevidaa'nyi, nya'mweihi, nayaa gara jijiwaava? Sarimi yi'bwa'namwaa'idivisagaa' gazaigizaigi ya'ne piri' kininnakeiginyi. Pwai yiledaata kininnakelyi. Yi pwai yihiziwiryane yagaalya' kininnakelyi. Yi pwai Gotiyari wi'noji yagaalya' yihiziwaakya'ne'

kininnakelyi. Yi pwai yagaala nabinabinya' kininnakelyi. Yi pwai yagaala dazavi marija'ne' kininnakelyi. Sarimi yuya sa kusilaanyaviyaraavi pada'galayivaimwagya'neihi nayaa sara jila! ²⁷A'mwe pwai kwai “Yagaala nabinabinya' myawiryadinya' diji,” yi “A'mwe pwaraai daakaji,” “A'mwe pwaraai pwai daakaji,” sara yiniga wi'na dipi'dere. Sa' wi'nanyi. Pwaraai aawa. Yi yuyara yagaala ye'mwannadiwilaawia mipina! Pwai yagaalya' mena tivi'na kadozi yi pwai dividaasi dathelyi. Nabaai yuyagaa' a'mwe pwai yagaalya' nayaa maridana! ²⁸Yi nabaai a'mwe yagaala marija'nei maayawi, yi a'mwe yagaala nabinabinya' dadei sai gannya maangi' nayaa bipalemwaaina yoji Kiraazitiyare kusilaanyavi kave mwaalana! Sai gavei yagaalya' yune Gotiyalyina ye'mwannadathelyi. ²⁹Gotiyari wi'nawijiwaakyaara, yi pwaraaina daraai dainanya kwara widipika! Yi wi'nawijiwaakya pwara yagaala sa' maryawibwapika! ³⁰Yi nabaai pwai mwaalina yadori yi Gotiyai sari yagaala piri' wibwaridaakwaja' yi a'mwei aayagaa' daavoji yagaala gamidaasi dathei, sai gamire yagaalya' yarai ji'mwannana! ³¹Sare' darevinyi. “Yi nemire a'mwe yuyara simunya' nayaa yawiramaapika! Yuyara kumire kuryaraavine diraginya' maapika!” dapiji sarimi yuyaihi Gotiyari wi'napiji yagaala sa' pwaigidaasi pwaigidaasi yiniga wi'na wijiwaakipineihilyi. ³²A'mwe Gotiyari wi'nawijiwaakadivisaraavire yanga sihumale sanna sahvara maremwaainadivisare. Pigaa' dina, pigaa' ji'mwannanyina yadivisare. ³³Sare' darevinyi. Gotiyai gavamarasi'nyiyagaala, maihuri'nyiyagaala kininnakei mi!. Aawa. Sai kwaamu'nanyabwi kininnakelyi. Sare'na yawi'daa nemire yi'bwa'namwaidaanyanna nayaa maremwainaade'nanyi.

Yuyaba Gotiyare tewaanyara Kiraazitiyare kusilaanya yuyangi yadivitabaabi! ³⁴kusilaanyangi a'mwe yagaalya' madipina! Sare' darevinyi. Sahini maange' bipalemwaaina yipika! Yagaala madipina! Aawa. Gotiyare kiwinyavi dinikabaabi' sahini dalaangewi nayaa mwaabika! ³⁵Nabaai sahini yagaala wi'nadivi! “Yagaala savire aaya kaavilya' yawiranganaana!” dipija' yi dividaa'nyi kunnya angengi kunnya kwalaangeraavi yidaangabika! Sare' darevinyi. Kusilaanya savi yagaala daza' nawi'nya yida'nanyabwi mi!. Wagila kininnakebulyi. ³⁶Gatha'darevaka! Gotiyare yagaalya' sariminyawidaa'nyi yima'nake' daa! Sarimi gaveihiryawi yi'mavake' daa! “A'mwe pwaraayawi aawa,” sara dimanigasaihi daa! Yida'nanyabwi mamidinyi be'na yivaniga!

³⁷A'mwe pwai gami sarina “Nimi Gotiyari wi'nawijiwaakadinyainyi.” Sai “Kurya Tewaanyare yanga sihumale' kininnakeinyi.” Yi sai yawirajai nayaa dara yawiramaarana! “Yilaaya yadaanyabwi neminyina Poli yida'mwake' yi sabwi Naangere kiwinyasi.” ³⁸Yi nabaai a'mwe pwai kwai sasara mibwakinyi yajai, yi sarina “Gotiyari wi'nawijiwaakadelyi,” nemi yibwakinaadei mi!. Sari kadika mu'naanna! ³⁹Nimire nya'mweihi, sarevi “Gotiyari wi'nawaaji pwaraavi wijiwakaana!” diragina dadivi!

dimwaalyila! Nabaai yagaala nabinabinyangi ja sabwina kimaakiya madakipina! ⁴⁰Yi yi'bwa'nawi'nadivisagaa' nayaa yida'na jila! Piri' mena yapi piri' jila! Sarevi Gotiyari yilaaya nawi'nyaanga nebulya'nanya' yima'nana!

Kiraazitiyai mena balaka ayina dikaavake'nesi.

15 ¹Nya'mweihi, yagaala tewaanya' yihiziwaake' sarimire simunya ayina maradihaa'bwata yihima! Yagaala tewaanya sa' sarimi mena maaresasi. Yi dazavi diraginna daa'divisasi. ²Yi yagaala tewaanya dazahirivina Gotiyai sariminyi yihivadaihasamaa'desi. Yi yagaala yihiziwaake' sarimi yaasiwa' limwagapija' yi sarimire simunyavi diraginna kuna mwakypija' myihivadaihasamaari yadesi. Aawa. Kiri' yaasiwa' malimwagari yipija' simunyavi diraginna kuna wakipija' yihivadaihasamaa'desi.

³Sare' darevinyi. Yagaala aaya mudi'nanya' nimi sariminyi yihimarimwange', yi sinnawi yagaala daza' maarageva. Yi yagaala diraginya sa' daresi. Gotiyare bukuyavi dinikevina nemire kayaa'nanyanna marasi'nya'nei Kiraazitiyai balakelyi. ⁴Yi simaangevi pwara sahwaril wilakesalyi. Yi Gotiyare bukuyavi dinikevina yirika darikaai dariki Gotiyai sareri gaalyari yidikaavakelyi. ⁵Yi sarei dividaasi Pitari yijiwaainnyina ya'. Yi sarei ayahi dividaasi gamire atiraai sivila puridaa'nyi pwaraalyaraavi yijiwaainnyina ya'. ⁶Nabaai dividaasi gave pigaa' neya'mwe kwalaalyaraavi yijiwaainnyina. Sahwara paaivi aadiretyaraji pwaraji mwaalesare. Yi neya'mwe dazaraaviya kwalaalya naangera sara kuna mwaaiha'. Mwaaihasara yihithipinere. Kiri' pwara se mena bale'. ⁷Yi nabaai dividaasi sahwai Jemizari yijiwaainnyina. Nabaai dividaasi yuya Apozeliyaraavi yijiwaainnyina. ⁸Yi wana sahwaravi dividaasi saaminnyagaa' bwaranyari ganaange' kayaa'na maarakabaai' sahwai niminyi yijiwaainnyina nyakeinyi. ⁹Sare' darevinyi. Apozeliya yuyaraavidaa'nya nimi wana maalikeinyi. Yi nimi Gotiyare kusilaanyaraavi kayaaka yigalake'na niminyina yiniga wi'na nyidipineinyi mi' "Sai Apozeliyalyira." ¹⁰Sare kiri' Gotiyai yanga gaimwanga nyadevi nimi mwaaiheinyi yi Apozeliyainyi sareinyira. Yi gamire yanga gaimwange' niminyine' yi sa' kune' mi'. Aawa nebulyasi. Sai nyigaimwadaa'nyi nimi wawinya diraginna miraagikireneinyi. Nabaai Apozeliya pwaraavire wawinya mena wawilaveneinyi. Sare kirivi nimi sainyi myivanige. Aawa. Gotiyare yanga gaimwange' nimiji nye'mwannamwaaida sa' sahirisa' yivanikesi. ¹¹Sarevidaa'nyi nimi yihye kwainyi dingaka? Apozeliya pwara yihyeta pwara dingaka? Dazavina yagaala maayasi. Nemi yuyaina Gotiyare yagaala sahirisa'na wijiwakadaanyaine. Yi sarimi yagaala sahirivina diraginna sara limwagaresaihilyi.

Dividaa'nyi yuya bainikera ayina dikaapi'de'nesi.

¹²Yuyagaa' nemi yagaalya' dara yihiziwakadaanyaine. Kiraazitiyari bainikeraayaba Gotiyai yidikaavake'nanyi. Sare'na sariminyi pwara dara gatha'dara yihithadivika!' "A'mwe mena bainikera, sara ayahi ayina yiniga wi'na dikaapi'devwi mwarika!" ¹³Nabaai yi nebulya'nanya' waraji kwaji yi a'mwe bainikera ayina yiniga wi'na madikaayi yapiji kwaji Gotiyai Kiraazitiyari ayina yidikaavake' nebulya'nanya' mwari kyadika! ¹⁴Nabaai Gotiyai Kiraazitiyari ayina midikaayi yaji kwaji yi savidaa'nyi nemi wijiwakadaanya yagaala daza kune saba sananya kwaradika! Yi sarimire Kiraazitiyari limwanga sa' kirisi kune saba sananya kwaradika! ¹⁵Yi nabaai sara yaji kwaji yi neminyina dara kabiramaapidike' "O, Apozeliyara Gotiyarina kwaasi jalikurakadivitaru daaka!" Nemi ku'maayaba dara jalikurakadaanyaine. Gotiyai Kiraazitiyari yidikaavakelyi. Sare'na Gotiyai a'mwe bainikeraavi midikaayi yade' nebulya'nanya' waraji kwaji yi sai Kiraazitiyai kwariji midikaayi kyadike'na nemi kwaasi kyihizalikurakaadika! ¹⁶Sare' darevinyi. "Divi sagaa' bainikeraavi midikaayi yadelyira," daaza' nabaai Kiraazitiyari midikaayi kyadika! ¹⁷Nabaai Kiraazitiyari midikaayi yaji kwaji yi sarimire diraginna limwangebwi waryaanyabwi kyima'nadika! Yi sarimi sarinnya kayaa'nanyangi kuna kamwaaibithika! ¹⁸Sarevidaa'nyi a'mwera Kiraazitiyari diraginna limwadivi' se mena baidivisara sara kwaraji kayaaka mena kyigainipidika! ¹⁹Yune nemi Kwaaka davaki gaala mwaidaanyagaa' gavegaa' Kiraazitiyari limwadaa dahaa'ne sahwarina yemwalaaji kwaji divi balya'negaa' manegaimwagyi yoji kwaji yi a'mwera neminyina kale naanga wiadeina kamwalaadika! Yi a'mwe yuya pwaraavina kale maalika wia' kwaradikesi. Neminyina kale naanga naanga wia' kwaradikesi.

²⁰Kiri' sasare' mi'. Kiraazitiyai mena balakeri yi Gotiyai ayina yidikaavakelyi. Yi tika munne yabwarya'negaa' nanyine tivi'na wa'da mala wa'devaai' Kiraazitiyarine a'mwe se bainikeraavi sai aaya yibwaradikaata yakei yuyagaa' mwaaidelyi. ²¹Sare' darevinyi. A'mwei, Aataami, yaakevi balyabwi wakyaa'. Yi a'mwei Jizaazai yakevi a'mwe bainikera ayina dikaaya'nebwi waka'. ²²Yi daresi. Aataamire yita savaakire yuyara sahwaru baidivitabaai' Kiraazitiyari wilamwaaividita yuyara sahwaru gaalyabwi maapi'dere. ²³Nabaai gazaizai yune gannya sagaa' ayina dikaa'na, yi gaalya' maaradelyi. Aaya mudi'nanyai tika munne mya gaai yadebisai sai Kiraazitiyalyi. Gaalya' mena ayina maarakelyi. Yi nabaai dividaa'nyi sai ayina walaabathevi nemi yuya Kiraazitiyare saina yi nemi gaalya' maraadeine. ²⁴Yi dividaa'nyi aayagaakira. Yi maremwaaide gazarizariji marahuzi'bwaremwaade gazarizariji diraginnaka gazarizariji saraavire

diraginya' Kiraazitiyai mari'mwagasi'noji sai Gotiyari Nimwari gannya maremwaaide' marimwangadelyi. ²⁵Sare' darevinyi. Kiraazitiyai kuna maremwaaladelyi. Gotiyai gamire yikamaangeraavi gamire sivilyiraaryaba galawilawakadehaa'na kuna maremwaaladelyi. ²⁶Gotiyai yuya yikamaanga pwaraavi mena marasi'noji yi nabaai yikamaanga aayaangebwi barya kibulyi yasi'nadelyi. ²⁷Sare' darevinyi. Dara dini' "Gotiyai yuya sahwayawi kwaakewi marulawakakengi." Sara dinika kiri' yi nemi mena yawi'manigo. Gotiyai yuya, yuyara Kiraazitiyari dalaangewi marulawakakei gami sai dalaangewi sahiniji mye'mwannamwaalyikelyi. Arikewi. ²⁸Nabaai divi Kiraazitiyari dalaangewi yuya yiniga wi'na marulawakina kyoji yi sagaa' Gotiyare Gawaalivaangei gami sai Gotiyari sahwai yuya marulawakakeri dalaangewi wilawakinadelyi. Yi "Gotiyai yuyangi yiniga wi'na maremwaaide nebulya'nanyai mwaalana!" dozi dalaangewi sara wilawakinadelyi.

²⁹Nabaai yagaala yidikaasaburine daza' nebulya'na mi yaji kwaji a'mwe bainikeraavi gaimwagya'ne' a'mwe pwara bavitaaziya' maa'manigasara beri' yipi'devaka! A'mwe bainikeraavi nebulya'na midikaayi yanne' kwaji sahwara a'mwe baimwa'daasaraavi gaimwagya'ne' bavitaaziya' be'na maa'manigataraavaka! ³⁰Yi nemi kwainaji gazagaasagaa' a'mwe pwara neminyina "Kayaaka yigalakaana!" dadivi' yaamiji neyadivisaine. Nabaai a'mwe bainikeraavi ayina midikaayi yanne' kwaji nemi Kiraazitiyari mididaanyaina sara be'na mwaaiho! ³¹Nya'mweihi, yuya yirikerikaavi nemi taanginya maa'di mena bainikeinyibisainyi. Sariminyine yaya' munyaba makimunebaaibi' daza' nebulya'na dadinyi. Nebulyasi. Kiraazitiyai Jizaazai sai nemire Naangeri wilamwaaivehi yaya munyaba makila sa' kininnakeinyi. ³²Nimi a'mweraavirebwina dide'nanyi. Anga Epazaazi nemi sigyaawaryaraji mala tanneinyi. Yi dazavi nemi tewaanya beni maa'mune'na! Nabaai yi a'mwe bainikeraavi ayahi midikaayi yanne' kwaji pwara dara dipi'de' tewaanya' beri' kwaradikaka! "Baa'nana! Nemi tika wapaaya naana! Aalya naana! Sare' darevinyi. Mwanayagaa' nemi balaadeina dingaka? Nemi yune menanyaina yima'naadeina dingaka?" ³³Akai, sahwara kwaasi kuna nayihithipidika! Dara jawirila! "Nemi a'mwe kayaa'nanyaraji ye'mwannayamaryadawaari yi sahwara nemire tewaanyabwi kayaaka nyigalakipidika!" ³⁴Sarimi navi'navikebwi nayaa yagalya'ma'na jila! Yapiji yidasabwina jawirila! Sarimi kayaa'nanya' aya kiri' ayawi nyipika! Sare' darevinyi. Sariminyidaa'nya pwara sahwara Gotiyarina wana myawiryadivisare. Sarimi wagila maarya'ne'na yagaala daza'na yihithiwa.

Kilaakeji' ayina dikaavadezikinesi.

³⁵Kiri' nabaai a'mwe pwai dara yidaanganadelyi "A'mwe bainikeraavi gatha'dara yidikaavaderaavaka? Yi sahwara be kilaakeji' maarapiji

ayina yima'naabipi'deraavaka?" ³⁶ Ai, navika dara yivaniginyaigi dingaka! Gimi kwaigi silya' mena buridinya' gamire kilaakeji' mabalyi yaja' yi sa' Gotiyai gaala marakade' mi'. ³⁷ Nabaai gimi buridiza daza' dividaasi kilaake' yima'naabathe avaala' mi'. Aawa. Gimi yune wiaina buridinyi. Witzila dinga'? Tika wapaa piningire silya dinga'? ³⁸ Yi Gotiyai gannya simunyavi mena yawiraka gamire kilaakeji', yi yaginya kiwata saza wijaavadezikira. Yi sai wia gazaizai gamire kilaakeji' giryadezi' wijaavadeziki. Pwari gannya kilaakeji' pwari gannya kilaakeji' wijaavadezikera. ³⁹ Miwita gazasa' avainanya' mi'. Aawa. A'mweraavire' gave nabinanyasi. Yi jilikyaawaryaraavire kumire miwita nabinyangi. Yi yikuriyaawiangire kumire miwita nabinanyangi. Yi yusaraavire kumire' nabinanyasi. Yi jawinyaraavire' nabinanyasi. ⁴⁰ Nabaai sigunyavi yilarika sa kilaaka kininnakengi. Yi Kwaakevaki warika sa kilaaka kininnakengi. Sare kiri' sigunyaviya byaanna diraginya' ge' wari'. Yi Kwaakevakiya byaanna diraginya' ge' wari'. ⁴¹ Yi sigunyaviyangina nyilyare byaanna diraginya' pirisi. Lawere byaanna diraginya' pirisi. Silingaaminyarikaavire byaanna diraginya' pirisi. Sare' darevinyi. Silingaamina pirikire byaanna diraginya' nabinyasi. Silingaamina pirikire byaanna diraginya' nabinyasi. Sana sana yadengira.

⁴² A'mwe bainikeraavire dikaasabwi sa' avaina sasaresi. Kilaaka nemi likirakadaanyaji', saji' sila buridaanyabaabi' bwia bu'deziki. Kilaaka Gotiyai ayina yidikaavadezi', mudika saji' bwia buradezi' mi'. ⁴³ Kilaaka nemi likirakadaanyaji', saji' yaya munyaba makilya'neji' mi'. Kilaaka Gotiyai ayina yidikaavadezi', saji' byaanna diraginya' kininnakejiki. Kilaaka likirakadaanyaji', saji' wirisajiki. Kilaaka yidikaavadezi', saji' diraginaange' kininnakejiki. ⁴⁴ Kilaaka likirakadaanyaji', saji' yi kwaakevinejiki. Aagilaakejiki. Kilaaka yidikaavadezi', saji' Kuryai maremwaaladeziki. Yi kwaakevakine kilaakeji' a'mweraavireji' waraja' yi Kuryarine kilaaka kiji' waradezikira. ⁴⁵ Sarevi Gotiyare bukuyavi dara dini! "A'mwe aaya mudi'nanyai, Aataami, a'mwei Kwaakevakinei yima'naka gaalya' kininnakei." Yi Aataami aaya diviyai a'mweraavire kuryaraavi gaala wijaaya'nei sai kuryai kininnakelyi. ⁴⁶ Kiri' sinnawi kuryare kilaakejiki wilamwaalyaji' gamidaasi yima'naka' mi'. Aawa. Kwaaka dathavakiya kilaakeji' sinnawi gamidaasi yima'nakesi. Yi kuryare kilaakeji' sa' dividaasi yima'nakesi. ⁴⁷ A'mwe aaya mudi'nanyai sai kwaakevakialyali. Sari Gotiyai yune kwaakesina yavikaryaakelyi. A'mwe yawidaa'nyai sai Sigunyaviyalali. ⁴⁸ A'mwe kwaaka dazavakiya dazaibi' nemi dividaa'nyai yima'nadaa yuya Kwaakevakiya a'mweina avainanyaine. A'mwe Sigunyaviya dazaibi' nemi dividaa'nyai yima'nadaa Kiraazitiyarina a'mwe Sigunyaviyaina yi nemi avaina yima'naadeine. ⁴⁹ A'mwe Kwaaka dazavakiyare ke'ba'nanyasiyaina mwaaihobaabi' yi nabaai divi a'mwe Sigunyaviyare ke'ba'nanyasiyaina mwalaadeine.

⁵⁰Nya'mweihi, nimi yagaala yida'nanya' yihithivanige. A'mwe miwisasi tawesi kininnakei Gotiyare maremwaaalade' yiniga wi'na maarannei mi' Nimware!. Nabaai bwia burya'ne sa' bwia maburyade savi yiniga wi'na maaranne' mi' Nimware!. ⁵¹Yithaanyi, sare'na Gotiyare nebulya' yoimavajalikurakya' yihiziwaakima! Yi nemi a'mwe yuyaina neina yima'nadaa balaadeina mi'. Nabaai kiri' yi nemi gaainakeinaji bainikeraji yuyaina, mudikeinaavi Gotiyai nemwaaihadeine. ⁵²Yime'nya'bi'na, yune tibaaliku'nya piva'na yadehaa', aayagaa'ne gware' jaka dathehaa' sara yadelyi. Sare' darevidaa'nyinyi. Gware' jaka widina kyoji a'mwe mena bainikeraavi bwia maburya'neraavi yidikaa'na yoji nemi gaainakeinaji yuyainaavi mudikeinaavi nemwaaihadeine. ⁵³Sare' darevidaa'nyinyi. Dare' Gotiyai dakakesi. Kilaaka bwia bu'de dazaji', saji' yade nayaa yaraaibwa'noji yuyagaa' bwia maburya'neji' nebaazi'makwadeziki. Kilaaka baide dazaji', saji' nayaa yade yaraaibwa'noji yuyagaa' gaala mwaalagothezi' nebaazi'makwadeziki. ⁵⁴Yi kilaaka bwia bu'dezi' saji' yade nayaa yaraaibwa'noji yuyagaa'ne bwia maburya'neji' kanebaazi'makwoji yi kilaaka saji' baidezi' nayaa yaraaibwa'noji yuyagaa'ne gaala mwaalagothezi' kanebaazi'makwoji yi sagaa' Gotiyare yagaalya' yunebanna yima'naabathesi. Dara dini' "Gotiyai malyavi wawilavaka baryaburi galavilawakakelyi. Yaka yuya yunebanna yi'mwagasi'nakelyi." ⁵⁵Yagaala piri' dara dini'

"Balyabwigi gimire sike' gava warika!

Balyabwigi gimire tamakya'ne lisinnyari' gavanaka!"

⁵⁶Baryabure lisinnyari' sa' kayaa'nanyabwi yadivisasi. (Yi daresi. A'mwera kayaa'nanyabwi yadivisa'na baryabwi naawinaanyaibisabwi yuna da'devulyi.) Nabaai kayaa'nanyabure diraginya' sa' Gotiyare Kiwinyasira. (Yi daresi. Gotiyare Kiwinya' a'mwera kayaa'nanyabwi yadivisabwi wibwaridaakwada kumirebwina kuminyine yiwetawakya' diraginna wijalikulakadesi.) ⁵⁷Sare kiri' nemi Gotiyari "Su! Su!" widaana! Yi sahwai nemire Naangei Jizaazai Kiraazitiyari neyavada'galanemwaaiahaka neminyine'na baryaburiji kayaa'nanyaburiji galavilawakakelyi. Yi sahwai sika sa' yanga nejaavanikelyi.

⁵⁸Ninnya nya'mweihi, sariminyina tewaanya nyivu'nadeihi, sarevi sarimi nayaa diraginna dithaayila! Yi sangina maali'na yibwaaya kiri' nyipidika! Sarimi Naangeri wawinya naange' yadivisa', sa' Naangerina kune' saba sana yiwina yade' mi'. Aawa. Diraginya' waragothesi. Sarimi sara yawi'divi' yuyagaa' Naangere wawinya sa' naanga naanga diraginna nayaa jila!

**Gotiyare a'mweraavi Jeruzaalemi mwaalyaraavi
gaimwanga ya'ne nigwiannessi.**

16 ¹Dahaa' sarimi yida'mwa'daasavina Gotiyare tewaanyara
Juthiya mwaalyaraavine nigwia dazanna wijaaya'ne

dimari'bwarakyidevina yihithima! Nimi Galeziya mwaalyaraavire Kiraazitiyare kusilaanyangi mena widakagevaaibi' sarimi kwaihilyi nayaa sasara jila! ²Yuya Saadehasa sarimijiya gazaizai wikiya pirikine nigwia maa'denna nayaa yawirana! "Gotiyai nayaa nyigaimwade'na aawawinya nayaa yena nigwia naanga maa'mweinyi dingaka!" yawi'da kwaala naanga marajaapaloji gave piba nayaa pada'galakana! Yi "Gotiyai nayaa nyigaimwade'na aawawinya'ne nigwia maalika maa'mweinyi dingaka!" yi kwaala maalika nayaa pada'galakana! Sarevi divi "Poli bi'mavojiyagaa' sahwaravina wijaaya'ne nigwia yarai namari'bwarakaadika!" dapiji sara jila! Yi sarevina mi'na jide'nanyira. ³Divi nimi kabi'mava'muji yi sagaa' sarimi saihi a'mwe pwara Anga Jeruzaalemina sarimire yanga daza' makulya'neraavi nayaa dithahilakyideihilyi. Yi nimi sahwaravine paaziya' "Yi dahwara nigwia makabiwaasara a'mwe tewaanyarera," dinike' wijaava'muji maryaasiwijara wipi'dere. ⁴Yi nabaai nimi dara yawi'mujainyi "Nimi kwainyiji wiwineinyi dingaka!" yi sahwaravina nimiji ye'mwannigwawaaderera.

Poli "Koridi mwaalyaraavi wanganima!" daka kaanya yamaryake'nesi.

⁵Dividaa'nyini nimi kaanya wawa'muji Maazathoniya simagidaasi yalotakudehaa' yi sariminyawinna bi'mavideinyi. Sare' darevinyi. Yi Maazathoniya saba kaanya tivi'na yamaryam'muji ⁶yi sarimiji pigaa'na yihye'mwannamwaalideinyi dingaka? Yi sarimiji kuna mwaaida'muji aalimavajinaake' mena yiwawojiyagaa'neinyi dingaka? Nabaai dividaa'nyini anga pibanna widehaa' yi sarimi "Nemi tusavine wimakwawaana!" dipija' niminyina sara jideihilyi. ⁷Sare' darevinyi. Nimore simunyavi daresi. Maalikegaa' nimi sariminyi yune tusagaa'na wanganya'na "Aala!" diwa. Sare' darevinyi. Naangei avaina yawiraja' nimore simunya' daresi. Nimi saaminyagaa' sarimiji yihye'mwannamwaalideinyi. ⁸Nabaai "Nimi dava anga Epazaazi kuna mwaalideinyi. Yi yune Juyaraavire Munne Pedikoziya' mena kyoji kaanya wideinyi," yawi'manige. ⁹Sare' darevidaa'nyinyi. Gotiyai tuta naange' niminyine' mena baasiwa'. Yi nimi wawinya yiniga wi'na ya'ne' wari'. "Naangerera yima'nipika!" dena nabaai dava Naangerine yikamaanga kwalaalya kwaraji mwaalina yigasa'na wawinya sa' maremwaaalideinyi.

¹⁰Dividaa'nyini sariminyawinna Timoti bi'mavajai "Gamire munyi' kave mwaalana! Nemireba lika myanna!" dapiji tewaanya nayaa duwila! Sare' darevinyi. Nimi sainyi yivanigevaaibi' sai Naangere wawinya' yadelyi. ¹¹Sarevidaa'nyini yi pwai kwai sarina dara nyawiradi!! "A'mwe miginyalyi. Yaasiwa'nanyalyi. Sari wanganakima!" Yi sahwaravina nayaa maarapiji "Polimyawinna nayaa yagalaawana!" dapiji sarimi nayaa kwaamu'na yadivi' dividaa'nyini sahwaravina tusavi dimakwidelyi. Sare' darevinyi. Sahwaravina neya'mwe kwaraavinaji yemwaalidelyi.

¹²Neya'mwei Aapolizarina yida'mwa'daasa' daresi. Nimi sahvari yagaala diraginna wideinyi. Saihwaigi nya'mwe pwaraji saraayawinna diwia! Dena kiri' sawhai dahaa' kaanya wiya'na "Aala!" diwa'di. Sai "Divi sagaaku' nabaai nayaannanyagaa' wangamuneinyi dingaka!" dozi yi sariminyawinna sai kaanna wina yadelyi.

¹³"Kayaaka nyigainaadika!" dadivi' sarimi mala nayaa yiwannadivi' sarinnya Kiraazitiyari limwangevi diraginna dithaayila! Sarimi a'mwe nebulya'nanyaihi nayaa dimwaalyila! Nayaa yihivaimwadaa'nyi diraginna dimwaalyila! ¹⁴Gazaza yadivi' yi Gotiyarinaji a'mwe kwaraavinaji tewaanya yihivu'nadevi sara jila!

¹⁵Nya'mweihi, sarimi mena dara yawi'maniga'. Sitepaanzalyi gamire angeviyaraji aayagaa' kumidaasi yuya Giriza mwaalyaraavi Kiraazitiyarera yima'nesare. Yevera nabaai kunnya yune simunyangina a'mwe Gotiyare tewaanyaraavi widaaya'nera mwaaihasare. Yi sawharaavina diraginna yihithide'nanyi. ¹⁶"Dazaraaviji yi a'mwe yuya sawharaavi gaimwadivi' wawinya dazavi miraagiki'divisaraaviji dalaangewi mwalaana!" dapiji sara jila! ¹⁷Sitepaanzalyi Posunaatazalyi Aakaaikazalyi sara niminyawinna biwa'daasare. Yi daza'na nimi yilaaya naanga yivanige. Davanna yibwa'nadivisaihirineba sarimijiya sawhara bama'mwa'daasa'na yilaaya yivanige. ¹⁸Sare' darevinyi. Sawhara nimire kuryari gaalya'na nyigaimwamanigasare. Yi kigaa' sarimire kurya kwaraaviji wigaimwamwaa'. Sarevidaa'nyi sarimi sasarreraavi yaya' munyaba makilya'ne' tewaanyasi.

¹⁹Piroviji Eziya mwaalyara Kiraazitiyare kusilaanyangiyara "Neya'mweihi!" yihithiwaa'. Aakwilaaji Pirizilasi sayolyi sayore angevi kusilaanyaviyaraji Naangerina "Neya'mweihi!" diraginna yihithiwaa'. ²⁰Davanya neya'mwe yuyara "Neya'mweihi!" yihithiwaa'. Gotiyare saburi yuyaihi pwai pwari pwai pwari tewaanya'na maangwidaayilaaya dimarinyila!

²¹Nimi Polinyi pikarya nyidayivanikeri pikariyisari' maarena ninnya asilyi dara yida'mwesi. Nya'mweihi! ²²A'mwe pwai Naangerina tewaanya muvu'nyi yajai Dikevi Gotiyai wimarasinadelyi. Nemire Naangei neminyawinna walaabana! ²³Naanga Jizaazare kale'na gaimwange' sa' sarimiji yanga yihye'mwannamwaa'na! ²⁴Kiraazitiyai Jizaazari wilaamwaa'hasaihi yuyaihirina nyivu'nadevwi yihye'mwannamwaa'na!

Poli